




柳田文庫  
文庫11  
D 289  
5





文庫11  
D 289  
5

元書卷十九

禮樂志第四

邵陽曾廉撰

歐陽修曰三代而上治出於一而禮樂達於天下三代而下治出於二而禮樂爲虛名故記曰樂者非謂黃鐘大呂弦歌干揚也樂之末節也故童子舞之布几筵陳樽俎列籩豆以升降爲禮者禮之末節也故有司掌之樂師辨乎聲詩故北面而弦宗祝辨乎宗廟之禮故後尸商祝辨乎喪禮故後主人是故德成而上藝成而下行成而先事成而後是故先王有上有下有先有後然後可以有制於天下也古之人論禮樂如此自漢以來習禮者惟徐生善爲容而蕭望之爲能言喪服之制樂則惟存騶虞伐檀鹿鳴文王數章而制氏世爲樂官頗能記其鏗鏘鼓舞而已故當時以禮缺

010190563915



樂壞爲文景之過而不知本之弗立未有能明其末者也自後去古益遠而百制悉廢矣然六代以下惟喪服尙能修明魏孝文有志復古而輒不免虛僞之譏也當時梁有五禮隋因之唐有貞觀顯慶開元諸禮宋有開寶通禮政和五禮而樂則隋有牛宏辛彥之等之論宋有阮逸胡瑗宋祁范鎮之說其後蔡元定又作律呂新書然皆推考黍尺以測律創圖謂必得聲氣之元究之鄭譯何妥蘇夔斷斷致辯而實不如萬寶常王令言之知音也然制作則亦難矣有知聲有知音而皆不能知樂也是故子在齊聞韶三月不知肉味曰不圖爲樂之至於斯也是時韶樂在齊聞之者亦眾矣然非孔子豈知韶哉故孟子曰今之樂猶古之樂也其時韶樂亦復在齊也而不能感人心志者聖德深遠蕩蕩如天民焉得而名之此禮樂之所以爲虛名遂至缺壞非盡後世君相之失也元

興言動多用國禮其初甚簡質侍臣怯辭多速古兒赤火兒赤云都赤而已又不以宮室而以毳帳太祖在和林立四斡兒朵斡兒朵者帳殿也怯綠連河起行宮亦如之其後新君卽位皆更作焉金碧輝煌椶毳其錦繡文飾也而諸王亦有之秦王帳殿張於銅人原橫亘數十里爲尤著云自世祖中統元年始造拱衛儀仗而其時御史魏初上書曰臣聞君猶天也臣猶地也尊卑之禮不可以不肅方今內有太常有史官有起居注以議典禮記言動外有高麗安南使者入貢中國昨聞錫宴而大臣威儀弗謹非所以尊朝廷正上下也疏入帝嘉納之然至元初已命定百官儀從而尙未遑興建宮闕凡遇稱賀則臣庶皆集帳殿前執法官厭其喧雜揮仗擊逐之輒去而復來於是翰林承旨王磐上疏曰舊制天子宮門不應入而入者謂之闌入由第一至第三門輕重有差宜令



宣徽院籍兩省而下百官姓名各依班序聽通事舍人傳呼贊引然後進其越次者殿中司糾察定罰不應入而入者準闕入罪庶朝廷之禮漸肅六年太保劉秉忠大司農孛羅奉旨命趙秉溫史杠訪前代知禮者肄習朝儀既而秉忠奏曰一人習之雖知之莫能行也於是許用十人遂徵周鐸劉允文尙文岳忱關思義侯祐賢蕭琬徐汝嘉從亡金故老烏古倫居貞完顏復昭完顏從愈葛從亮于伯儀及國子祭酒許衡太常卿徐世隆稽諸古典參以時宜緣情定制而肄習之百日而畢秉忠復言須徵樂工輔禮而行於是帝命丞相安童大司農孛羅擇蒙古宿衛士可習容止者二百餘人肄之期月七年二月奏以丙子觀禮前期布綿蕞於金帳殿前帝及皇后臨觀於露階禮文樂節悉無遺失明年遂立侍儀司製內外仗及雲和署樂位其歲八月以天壽聖節始用朝儀十

一月劉秉忠王磐徒單公履等言元正朝會聖節詔赦及百官宣敕具公服行禮從之十一年正月朔宮闕告成帝始御正殿受皇太子諸王百官朝賀先期侍儀使糾庀陳設序班以板位殿上執事百六十有七人殿下執事二百十有三人殿下黃麾仗四百四十有八人旗仗五百二十有八人儀衛咸備而禮彬彬矣然猶襲遼禮皇帝與皇后同升御榻其先左右衛上將軍兼殿前都點檢以下起居舞蹈山呼次則后妃諸王駙馬以次賀獻然後丞相以下文武百僚起居如左右衛上將軍之禮丞相復進酒三以獻兩宮帝后舉觴於是乃進表章禮物又始以一人執劈正斧導從兩宮至大明殿先後出閣既升榻遂以劈正斧立於漏南酒海前劈正斧以水蒼玉爲之謂所以正人之不正前此未之有也或曰劈正斧自殷時流傳云其後延祐時御史馬祖常上疏曰百官朝見



奏事古之常也今國家有天下百年典章文物屢復古制惟常朝闕而不講夫羣臣奏對之際御史執簡史官執筆搢紳佩玉儼然左右則雖懷奸利乞恩賞亦不敢公然出諸口矣如蒙命中書省會集文翰各官參酌古今之宜或三日二日一常朝則治道昭明生民之福也然元自大朝賀外每日則宰相入延春門及別殿奏事而已常朝朝參之禮元終未及施行也其大朝會亦不能無失禮泰定時曹元用爲禮部尙書糾儀官以朝會多爭門而出乃申卷班之令俾以序退又言太醫儀鳳教坊等官不當序正班當自爲一列從之初太祖時以西夏高耀智言徵用西夏舊樂太宗十年宣聖孫元措來朝奏曰今禮樂散失而亡金太常故臣及禮冊樂器多有存者宜與收錄以崇文教於是太宗乃詔知禮樂舊人竝其家屬徙東平令元措領之於本路稅課所給其食禮樂人稍

稍足自振矣明年元措至燕京復得金掌樂許政掌禮王節及樂工翟剛等九十二人又明年遂製登歌樂肄習於曲阜宣聖廟其後憲宗二年命太常禮樂人赴日月山用登歌樂祀昊天上帝始用冕服矣祭畢禮樂人仍驛還東平是時世祖方在藩劉秉忠上書言近代禮樂器具靡散宜令刷會徵太常舊人教引後學使器存人備漸以修之實太平之基王道之本也後數歲既卽位乃命宣撫廉希憲等召禮樂人至燕京其歲以新製雅樂享祖考於中書省遂立仙音院中統二年初製太常禮樂工服四年作七室樂章其後至元元年括金樂器散在寺觀民家者逾二歲新樂服成樂工至自東平敕翰林院定撰八室樂章於是乃用宮縣登歌樂文武二舞於太廟其舞第一成象滅王汗二成破西夏三成破金四成收西域定河南五成取西蜀六成臣高麗服交趾是時宋未



平也其歲復籍近畿儒戶三百六十四爲樂工而罷遣東平舊人其留者九十二戶而已明年太常寺遂上言自古帝王功成作樂樂各有名所以形容盛德也皇上留心至治首敕有司修完登歌宮縣八佾樂舞以備郊廟之用若稽古典宜有徽稱謹案歷代樂名黃帝曰咸池龍門大卷少昊大淵顓頊六莖高辛五英唐堯大咸大章虞舜大韶夏禹大夏商湯大濩周武大武降及近代咸有厥名宋總名曰大晟金總名曰大和今擬上大成大明大同大順大豫等名乞詳定焉於是帝爲下詔錫名曰大成云其後遂改仙音院曰玉宸院又改曰儀鳳司雲和安和常和天樂四署屬焉皇后皇太子受冊寶竝用教坊樂教坊司興和祥和屬焉皆有廣樂署掌樂器其禮則有太尉冊官寶官禮儀使行事又有主節官以節導冊寶授焉其致賀進酒表箋禮物皆稍同天子元正朝賀儀

其後宮闕告成大明殿受朝賀之歲遂製內廷曲舞中書以上皇帝冊寶下太常樂署編運樂曲及上壽曲譜是時博士竝言制冕旒袞衣裳帶履舄黻佩以祀天地宗廟受冊尊號元日受朝冊太子則用之又議殿廷皆用雅樂而皆不果用也明年宋平詔凡太常寺祭器樂器法服樂工鹵簿儀衛盡運入燕京而宋太廟景靈宮禮樂器悉入國矣其歲以近畿樂戶多逃亡復徵工東平見於香閣文郎魏英舞迎神黃鐘宮曲武郎安仁舞亞獻無射宮曲十八年皇后耐廟製昭睿順聖皇后室曲舞明年王積翁又請徵亡宋雅樂器至京師置於八作司二十一年大樂署言宜悉付本署中書命八作司與之鑄鐘二十有七編鐘七百二十有三特磬二十有二編磬二十有八鐃六單雙鐸各五鈺鐸各八其歲正月帝御大明殿丞相和禮霍孫率百官復上尊號諸王百官朝賀如朔



元書 卷十九 五  
曰儀明年遂徙江南樂工八百家於京師其後占城真臘復貢樂工十人而樂備四夷矣是時太常卿忽都于思奏大樂見用石磬聲律不協稽諸古典石莫善於泗濱女直未嘗得此今泗在我封疆內宜取其石以製磬而磬材備矣其後社稷立而世祖崩成宗立祔世祖裕宗於太廟其後郊壇宣聖廟皆有樂章及武宗卽位而祔順宗成宗又製祀先農樂章既而武宗仁宗英宗明宗祔廟皆有曲譜舞節及文宗祔廟亦備禮樂未幾卽罷去又有皇太后及太皇太后上尊號進冊寶儀太后升殿天子親謁躬授進酒其太尉各攝官進奉起居亦略如皇后受冊寶之禮樂亦用教坊云大率元代諸禮皆取文具而已始時冕服偶服焉至英宗時丞相拜住上鹵簿圖帝以唐制用萬二千三百人爲耗財定大駕三千二百人法駕二千五百人遂備鹵簿造五輅矣亦始用袞冕以祀

天大裘亦具焉其制固先代禮書所具載也而郊廟祭服則三獻官司徒大禮使籠巾貂蟬冠青羅服紅牡丹羅裙蔽膝五皆白紗中單紅組金綬紳象笏銀束帶玉佩白羅方心曲領赤革履白綾襪執事官貂蟬獬豸七梁六梁五梁四梁三梁二梁冠青羅服紅梅花綾裙蔽膝二百皆織金綬紳銅束帶銅佩其中單曲領履襪皆同獻官祀日若遇陰雨則服紫羅公服樂則有天成隆成欽成甯成明成和成之曲以用於郊來成順成肅成嘉成和成豐成之曲以用於廟然太常所擬親祀禘禘樂章未之用也社稷祭服青羅袍紅梅花羅裙百二十有三樂則登歌奏鎮甯甯億甯豐甯保甯咸甯之曲宣聖廟祭服獻官七梁冠鴉青袍紅羅裙蔽膝三皆白絹中單絨錦綬紳方心曲領藍結帶銅佩革履白絹襪執事儒服九十有八樂則有凝安同安明安豐安成安文安娛安之曲



而曲阜宣聖廟亦有祭服視此爲繁矣其後又製祀先農禮樂如社稷之制其後又祭三皇如祭孔子禮而樂有成成賓成臨成蠲成恭成祇成史復闕其數曲未之詳也其後順帝後至元六年皇帝將親祀太廟欲製袞冕而粹或以英宗元製進眾議以爲舊物欲阻之學士楊瑀曰玉璽宮殿龍牀皆舊也何不更乎遂服之其後袞冕用日稀矣而腰輿象轎則元所通用也又天子卽位皆新製珠衣而皇太子之服初擬製冕服迄未能就其自古帝王而下祭器不用籩豆儀非酌獻者有司便服行禮三上香奠酒而已其宴享之禮則天子質孫冬之服凡十有一服金錦剪絨則服金錦煖帽服大紅桃紅紫藍綠寶里則服七寶重頂冠服紅黃粉皮則冠紅金荅子煖帽服白粉皮則服白金荅子煖帽服銀鼠則冠銀鼠煖帽其上竝加銀鼠比肩夏之服凡十有五服金錦綴大珠則

冠寶頂金鳳鉞笠服金錦綴小珠則服珠子捲雲冠服金錦則帽亦如之服大紅珠寶里紅毛子荅刺則冠珠緣邊鉞笠服白毛子金絲寶里則冠白藤寶貝帽服駝褐毛子則帽亦如之服大紅綠藍銀褐金繡龍五色羅則冠金鳳頂笠各隨其服之色服金龍青羅則冠金鳳頂漆紗冠服七寶珠龍荅子則冠黃身忽寶貝珠子帶後簷帽服青速失金絲闌子則冠七寶漆紗帶後簷帽百官質孫冬之服九大紅金錦一大紅剪絨一大紅官素一桃紅藍綠官素各一紫黃鴉青各一夏之服十有四素金錦一聚線寶里金錦一棗褐渾金閒絲蛤珠一大紅官素帶寶里一大紅明珠荅子一桃紅藍綠銀褐各一高麗鴉青銀雲袖羅一駝褐茜紅白毛子各一鴉青官素帶寶里一凡勳戚大臣近侍賜卽服之以與內庭大宴下至於樂工術士皆有之又凡宴享一人執觴立於右階一人



六書 卷一  
執拍板立於左階執板抑揚其聲曰幹脫執觴者和之曰打弼則板作於是王公以下如禮坐立而眾樂作乃進酒帝前帝卒飲授觴則奏曲以飲陪位官謂之喝蓋以爲承金禮也而其婚禮不可考世祖後納南必皇后世祖爲皇太子納妃順宗納荅納失里皇后史皆不紀其禮其國人蓋從其本俗其公主亦多從諸叔繼尙然例禁姑表兄弟嫂叔不相收及諸漢人南人父歿子收其庶母兄歿弟收其嫂者皆有禁而不能禁蒙古色目也其後至正初歲御史烏古孫良楨上疏曰國俗父死則妻其後母兄弟死則收其妻父母死無憂制夫綱常皆出於天而不可變議法之吏乃言國人不拘此例諸國人皆從本俗是漢南人當守綱常而國人諸國人不必守綱常也名曰優之實則陷之外若尊之內實侮之推其本心所以待國人不若漢南人之厚也請下禮官有司及右科進

士在朝者會議自天子至庶人皆從禮制以成列聖未遑之典明萬世不易之道不報其後十五年大幹兒朵教授鄭咍亦言蒙古乃國家本族宜教以禮不宜收繼母叔嬸兄嫂以貽笑後世亦不從又元世凡被罪籍家者皆以其婦女賞有功天祗初中書言凡有罪者既籍其家貲復沒其妻女非古者罪人不孥之意也今後請勿没人妻女其後至正初樞密都事遂魯曾上言前伯顏專殺大臣其黨利其妻女巧誣以罪今請令大小官及諸人有罪止坐其身不得籍其妻女從之然亦不能革也其喪禮則凡帝后疾革移居外帳殿及晏駕以楠爲棺刳中肖人本形斂用貂皮襖帽殉以金壺盞碗碟匙箸而鍊黃金爲四條以束棺喪車用白氈青緣金錦爲簾覆棺亦如之前行用蒙古巫媪而牽一馬以黃金飾鞍轡亦籠以金錦謂之金靈馬日用羊奠祭者三葬皆於起輦谷送



葬官三居五里外日燒飯致祭三年然後返其服制未聞仁宗崩英宗在儲位哀毀過禮素服寢於地日啜一粥至治時太皇太后崩十月享太廟以國哀迎香去樂而國人無丁憂制廉希憲爲平章政事母喪率親族行古禮勺飲不入口者三日慟則嘔血不能起寢卧草土廬於墓旁宰執以憂制未定欲力起之詣廬聞其號慟竟不忍言也有詔起復希憲雖不敢違然出則素服入必衰絰及喪父亦如之大德中梁曾丁內艱時亦丁憂之制未行曾上言請如禮除潭州總管以未終制不赴其後制漢人南人五服如其舊諸職官親死不奔喪及未終喪赴官若有罪詐稱親喪親久歿稱始死者及匿親喪縱宴樂遇國哀私家設音樂者竝有禁其被私罪當問罹大故而奔赴丁憂俟終制日問之惟國人相承不改延祐中御史言父母之喪天下之通喪也風俗日薄近年江南父

母之喪小斂未畢便茹暈飲酒略無顧忌至於送殯管絃歌舞導引輜柩焚葬之餘張筵排宴不醉不已泣血未乾享樂如此昊天

之報其安在哉莫若今後除蒙古色目人合從本俗其餘人等違者斷罪所在官司申禁不嚴罪亦及之其時閩海廉訪司復申停葬之禁泰定時丞相塔失帖木兒倒刺沙竟請凡蒙古色目人效漢法丁憂者除其名從之其後天祿二年乃詔官吏丁憂依本俗蒙古色目倣倣漢人者不用部議其願丁父母憂者聽然至正時猶未改其俗也其有官居喪者亦往往奪情起復御史陳思謙言三年之喪謂之達禮自非金革不可從權遂著於令其明著者如此又每歲九月及十二月旣望以後於燒飯院中用馬一羊三馬漣酒醴紅織金幣及裏絹各三匹命蒙古達官及巫覡掘地爲坎以燎肉仍以酒及漣雜燒之巫覡以國語呼累朝御名而祭之又



歲十二月望後用白黑羊毛爲線帝后及太子纏繫之自頂至手足坐於寢殿蒙古巫覡口呪之而奉銀槽貯火置米糠其中沃以酥油帝斷其線納諸槽而以其煙薰焉又帝手自裂紅帛數寸唾之三竝投火中卽解衣帽以付巫覡又以十二月下旬灑掃西鎮國寺內牆下內府監供綵幣中尙監供細氈針線武備寺供弓箭環刀束稗草爲人一狗一剪雜色綵段爲之賜胄選貴族而射之非別速札刺兒乃蠻忙兀台列班荅荅珊竹雪泥等氏族不得與列射至糜爛以羊酒祭之帝后及太子妃嬪並射者各解衣俾巫覡祝之遂以與之皆名之曰脫災迎福國人謂此爲射草狗也皆其國俗禮也其樂器登歌二虞宮縣三十六虞皆宋金所有也樂隊有四曰樂音王隊元旦用之曰壽星隊天壽節用之曰禮樂隊朝會用之又有說法隊皆僧伽菩薩冠服其器琵琶箏笙篳篥

杖鼓威栗拍板方響亦世之所習知也以載宋金志故皆不具惟興隆笙其制植眾管於柔韋以象大匏工鼓二韋橐按其管則簧鳴篳首爲二孔雀笙鳴機動則應而舞以爲樂作止之節火不思制如琵琶直頸無品有小槽圓腹如半瓶楹以皮爲面四絃皮絀同一孤柱或曰古渾不似也胡琴則又制如火不思卷頸龍首以弓捩之弓之絃以馬尾雲璈制以銅爲小鑼十三同一木架下有長柄又有札鼓和鼓皆左持而右擊之又箏制如箏而七絃有柱用竹軋之又龍笛七孔羌笛則三孔水盞制以銅擊以鐵箸又有金鞞小鼓花鞞稍子鼓日月鼓日月金鞞稍子鼓魚鼓簡子皆未知其制而教坊司又有伎樂有御前承應雜戲飛竿走索踢弄藏擲等戲以爲娛樂大率元所施行有太常集禮復有太常至正集禮至元州縣社稷通禮廟學典禮三皇祭禮而諸禮樂家杜瑛有



禮樂雜志趙孟頫有祭器圖式有樂原熊朋來有律論曾巽申有  
鹵簿圖郊祀禮樂圖其時齊履謙爲太史院使意謂元立國百年  
而郊社之樂沿襲宋金未有能正之者遂上言樂本於律律本於  
氣候氣之法可擇僻地爲密室取金門之竹及河內之葭葦候之  
上可以正雅樂薦郊廟和神人下可以同度量平物貨正風俗適  
遷他官事遂寢吳萊言太常所用樂蓋宋大晟之遺法大晟樂造  
自黥卒魏漢津漢津嘗私謂其弟子曰樂律高北方元鼎水又溢  
出律高則聲過哀而國亂水溢出則國有變而境土喪沒是不久  
矣是漢津亦自知其所造之失也萊亦以爲宜依古法緹室候氣  
如履謙之言然卒莫能定也

郊祀樂章

大德六年合祭天地五方帝樂

降神乾甯六成圓鐘宮二成黃鐘角一成太簇徵一成姑洗羽一  
成詞竝同 惟皇上帝監德昭明祀考承天治底隆平孝思惟則

禋祀薦誠神其降格萬福來竝

初獻盥洗肅甯黃鐘宮 明水在下鐘鼓既奏有孚容若陟降左  
右辟公處之多士裸將吉蠲以祭上帝其饗

升降肅甯大呂宮 禋祀孔肅盥薦初升攝齊敬恭以薦惟馨肅  
雖多士來格百靈降福受釐萬世其承

奠玉幣闕大呂宮 宗祀配饗肇舉明禋嘉玉既設量幣斯陳惟  
德格天惟誠感神於萬斯年休命用申

迎俎豐甯黃鐘宮 有碩斯俎有滌斯牲鸞刀屢奏血膋載升禮  
崇繭栗氣達尙腥上帝臨止享於克誠

酌獻嘉甯大呂宮 崇崇泰時穆穆昊穹神之格思肸蠁斯通儀



尊載列黃流在中酒既和止萬福攸同

亞終獻咸甯黃鐘宮 六成既闋三獻云終神具醉止穆穆雍雍

和風慶雲賁我郊宮受茲祉福億載無窮

徹豐甯大呂宮 禮禮既備神具宴娛籩豆有楚廢徹不遲多士

駿奔樂且有儀乃錫純嘏永佐丕基

送神闕圓鐘宮 殷祀既畢靈馭載旋禮洽和應降福自天動植

咸若陰陽不愆明明天子億萬斯年

望燎闕黃鐘宮 享申百禮慶洽百靈奠玉高壇燔柴廣庭祥光

達曙燦若景星神之降福萬國咸甯

大德九年定擬親祀郊壇樂

皇帝入中壇黃鐘宮 赫赫有臨洋洋在上克配皇祖於穆來饗

肇此大禋乾文宏朗被袞圓丘巍巍元象

盥洗黃鐘宮 翼翼孝思明德洽禮功格元穹有光帝始著我精

誠潔茲薦洗幣玉攸奠永集嘉祉

升降大呂宮 天行惟健盛德御天日月龍章筍簾宮縣藁鞞尙

明禮璧蒼圓神之格思香升燔煙

降神天成六成圓鐘宮三成黃鐘角一成太簇徵一成姑洗羽一

成詞竝同 烝哉皇元丕承帝眷報本貴誠于郊殷薦藁鞞載陳

雲門六變神之格思來處來燕

初獻盥洗隆成黃鐘宮 肇禋南郊百神受職齊潔惟先匪馨于

稷迺沃迺盥祠壇是陟上帝監觀其儀不忒

初獻升壇降同隆成大呂宮 於穆圓壇陽郊奠位孔惠孔時吉

蠲爲饗降登祇若百禮既至願言居歆允集熙事

奠玉幣正配位同欽成黃鐘宮 謂天蓋高至誠則格克禋克祀



奔走百辟制幣斯陳植以蒼璧神其降康俾我來益

司徒捧俎甯成黃鐘宮 我牲既潔我俎斯實笙鏞克諧籩豆有

飶神來宴娛歆茲明德永錫繁禧如幾如式

昊天上帝酌獻明成黃鐘宮 於昭昊天臨下有赫陶匏薦誠聲

聞在德酌言獻之上靈是格降福孔偕時萬時億

皇地祇酌獻大呂宮 至哉坤元與天同德函育羣生元功莫測

合饗園壇舊時典式申錫無疆聿甯皇國

太祖酌獻黃鐘宮 禮大報本郊定天位皇皇神祖反始克配至

德難名元功宏濟帝典式敷率育攸墜

飲福大呂宮 特牲享誠備物循質上帝居歆百神受職皇武昭

宣孝祀芬苾萬福攸同下民陰隲

出入小次黃鐘宮 惟天惟大惟帝饗帝以配祖考肅贊靈祉定

極崇功永我昭事升中於天象物畢至

文舞退武舞進和成黃鐘宮 羽籥既竣載揚玉戚一弛一張匪

舒匪棘八音克諧萬舞有奕永觀厥成純嘏是錫

亞終獻和成黃鐘宮 有嚴郊禋恭陳幣玉大禋是承載祇載肅

上帝居歆馨香既飶惠我無疆介以景福

徹甯成大呂宮 三獻攸終六樂斯徧既右享之徹其有踐洋洋

在上默默靈眷明禋告成於皇錫羨

送神天成圜鐘宮 神之來歆如在左右神保聿歸靈旂先後恢

恢上圓無聲無臭日監孔昭思皇多祐

望燎隆成黃鐘宮 熙事備成禮文郁郁紫煙聿升靈光下燭神

人樂康永膺馘穀祚我不平景命有僕

出中壝黃鐘宮 泰壇承光寥廓元曖暢成揚明饗儀惟大九服



敬宣聲教無外皇拜天祐照臨斯屆 遣官攝祀樂曲竝同  
宗廟樂章

中統四年七室樂

太祖第一室 天垂靈顧地獻中方帝力所拓神武莫當陽谿昧  
谷咸服要荒昭孝明禋神祖皇皇

太宗第二室 和林聖域天邑地宮闕 南北來同闕司分

置胄教肇崇潤色祖業德仰神宗

睿宗第三室 珍符默授疇昔自天爰生聖武寶祚開先霓旌廻

狩龍駕游仙追遠如生皇慕容然

皇伯考朮赤第四室 威闕鷹揚冢位闕當從龍遠拓千萬里疆

誕總虎旅駐壓西方航海梯山東西來王

皇伯考察合台第五室 雄武軍威滋多歷年深謀遠略協贊惟

專流沙西域餞日東邊百國畏服英聲赫然

定宗第六室 三朝承休恭已優游欽繩祖武其德聿修帝慈錫

壽德澤期周蠲饑惟薌祈饗於幽

憲宗第七室 龍躍潛居風雲會通知民病苦軫念宸衷夔門之

旅繼志圖功俎豆敬祭華儀孔隆

至元四年八室樂

迎神來成九成黃鐘宮三成大呂角太簇徵應鐘羽各二成詞竝  
同 齊明盛服翼翼靈眷禮備多儀樂成九變烝烝孝心若聞且

見胙饗端臨來甯來燕

初獻盥洗肅成無射宮 天德維何如水之清維水內耀配彼天

明以滌以濯犧象光晶孝思惟則式薦忱誠

升殿降同登歌肅成夾鐘宮 祀事有嚴太宮有洫陟降靡違孔



容翼翼籩豆旅陳鐘磬翁繹於昭吉蠲神保是格

司徒捧俎嘉成無射宮 色純體全三犧五牲鸞刀屢奏毛魚載

羹神具厭飫聽我磬聲居歆有永胡考之甯

烈祖第一室開成無射宮 於皇烈祖積厚流長大勳未集燮伐

用張篤生聖嗣奄有多方錫我景福萬世無疆

太祖第二室武成無射宮 天扶昌運混一中華爰有真人奮起

龍沙際天開宇巨海為家肇修禋祀萬世無涯

太宗第三室文成無射宮 纂成前烈底定丕圖禮文簡省禁網

寬疏還風太古躋世華胥三靈順協四海無虞

皇伯考朮赤第四室弼成無射宮 神支挺秀右壤疏封創業艱

難相我祖宗敘親伊邇論功亦崇春秋祭祀萬世攸同

皇伯考察台台第五室協成無射宮 玉牒期親神支懿屬論德

疏封展親分玉相我祖宗風櫛雨沐昔同其勞今共茲福

睿宗第六室明成無射宮 神祖創業爰著戎衣聖考撫軍代行

天威河南底定江北來歸貽謀翼子奕葉重輝

定宗第七室熙成無射宮 嗣承丕祚累洽重熙堂構既定垂拱

無為邊庭閒暇田里安綏歆茲禋祀萬世攸宜

憲宗第八室威成無射宮 義馭未出螢燭騰光大明麗天羣陰

披攘百神受職四海甯康愔愔靈韶德音不忘

文舞退武舞進和成無射宮 天生五材誰能去兵恢張宏業我

祖天聲干戈曲盤濯濯厥靈於赫七德展也大成

亞終獻順成無射宮 幽通神明所重精禋清宮肅肅百禮具陳

九韶克諧八佾煚煚靈光昭答天休日申

徹登歌豐成夾鐘宮 豆籩苾芴金石鏘鏘禮終三獻樂奏九成



有嚴執事進徹無聲神保聿歸萬福來甯

送神保成

又作來成

黃鐘宮

神主在室神靈在天禮成樂闋神返幽

元降福冥冥百順無愆於皇孝思于萬斯年

至元十八年世祖皇后酌獻樂

徽柔懿哲温默靖恭範儀宮闈

任姒同風敷天甯謐內助多功淑德祔廟萬世昌隆

至元時擬親祀禘祫樂

皇帝入門宮縣順成無射宮

熙熙雍雍六合大同維皇有造典

禮會通金奏王夏祇款神宮感格如響嘉氣來叢

升殿順成夾鐘宮

皇明燭幽沿時制作宗廟之成降登時若趨

以采茨聲容有恪日藝日文監茲衍樂

詣巽洗順成無射宮

酌彼行潦惟挹其清潔齊以祀祀事昭明

肅肅辟公沃盥乃升神之至止歆于克誠

詣酌尊順成無射宮

靈庭愔愔乃神攸依文為在禮載斟匪祈

皇皇穆穆玉佩聲希列侯百辟濟濟闕威

迎神思成 卽至元四年來成

司徒捧俎嘉成 卽至元四年元曲

始祖酌獻慶成無射宮

啟運流光幅員既長敬恭祀事鬱鬯芬

薌德以舞象功以歌揚式歌且舞神享是皇

諸廟酌獻熙成昌成鴻成樂成康成明成並闕

文舞退武舞進肅成 卽至元四年和成

亞終獻肅成 卽至元四年順成

飲福登歌釐成夾鐘宮

誠通恩降靈慈昭宣左右明命六合大

全啐飲椒馨純嘏如川皇人壽穀億萬斯年

徹豐成夾鐘宮

三獻九成禮畢樂闋于豆于登于焉靖徹多士



密勿樂且有儀能事脫穎孔惠孔時

送神保成黃鐘宮 雲車之來不疾而速風馭言還聞其悅惚神

心之欣孝孫之祿燕翼無疆景命有僕

泰定時十室樂

皇帝入門順成 同禘祫

盥洗順成

升殿登歌順成 均同禘祫

出入小次昌甯無射宮 於皇神宮象天清明肅肅來止相維公

卿威儀孔張君子攸甯神之休之綏我思成

迎神思成 卽至元四年來成

初獻盥洗肅成 升降登歌肅甯卽肅成俱卽禘祫順成

司徒捧俎嘉成 卽至元四年原曲

太祖第一室開成 卽至元四年武成

睿宗第二室武成 卽至元四年明成

世祖第三室混成無射宮 於昭皇祖體健乘乾龍飛應運盛德

光前神功耆定澤被垓埏貽厥孫謀何千萬年

裕宗第四室昭成無射宮 天啟深仁須世而昌追惟顯考敢後

光揚徽儀肇舉禮備音鏘皇靈監止降釐無疆

顯宗第五室後撤去樂佚

順宗第六室慶成無射宮 龍潛於淵德昭於天承休基命光被

絃埏洋洋如臨籩豆牲牲惟明惟馨皇祚綿延

成宗第七室守成無射宮 天開神聖繼世清甯澤深仁溥樂協

韶英宗枝嘉會氣和惟馨繁禧來格永被皇靈

武宗第八室威成無射宮 紹天鴻業繼世隆平惠孚中國威靖



邊庭厥功惟茂清廟妥靈歆茲明祀福祿來成

仁宗第九室歆成無射宮 紹隆前緒運啟文明深仁及物至孝

躬行惟皇建極盛德難名居歆萬祀福祿崇成

英宗第十室獻成無射宮 神聖繼作式是憲章誕興禮樂躬事

烝嘗翼翼清廟煜有耿光于千萬年世仰明良

飲福登歌釐成夾鐘宮 穆穆天子禋祀太宮禮成樂備敬徹誠

通神胥樂止錫之醕醴天子萬世福祿無窮

文舞退武舞進肅成 卽至元四年和成

亞終獻肅成 卽至元四年順成

徹豐甯 卽至元四年豐成

送神保成 卽至元四年元曲

出廟庭昌甯無射宮 緝熙惟清吉蠲致誠上儀具舉明德薦馨

已事而竣歡通三靈先祖是皇來燕來甯

天祿三年明宗耐廟酌獻永成無射宮 猗那皇明世贊神武敬

天弗違時潛時旅龍旂在塗言受率土不遐有臨永錫多嘏

社稷樂章

降神鎮甯八成林鐘宮二成 以社以方國有彝典大哉元德基

祚絲遠農功萬世於焉報本顯相默佑降監壇墀 太簇角二

成 錫民地利厥功甚溥昭代典禮清聲律呂穀旦于差洋洋

來下相此有年根本日固 姑洗徵二成 平厥水土百穀用

成長扶景運宜歆德馨五祀為大千古舉行感通肸鬩登歌鎮

甯 南宮羽二成 幣齊虔修粢盛告備倉庾坻京絜誰之賜

崇壇致恭幽光孔邇享于精誠休祥畢至

初獻盥洗肅甯太簇宮 禮備樂陳辰良日吉挹彼樽罍馨哉黍



稷濯漑揭虔惟巾及羣萬年嚴祀踳踳受職

升壇降同肅甯應鐘宮 春祈秋報古今彝章民天是資神靈用

彰功崇禮嚴人阜時康雍雍為儀燔芬苾香

正配位奠玉幣億甯太簇宮 地祇嚮德稽古美報幣帛斯陳圭

璋式纁載烈載燔看羞致告雨暘時若不圖永保

司徒捧俎豐甯太簇宮 我稼既同羣黎徧德我祀如何牲牲孔

碩有嚴有翼隨方布色報功求福其儀不忒

正位酌獻保甯太簇宮 異世同德於皇聖昭降茲嘉祥衛我大

寶生乃烝民侔德覆燾厥作裸將有相之道

配位酌獻保甯太簇宮 以御田祖皇家秩祀有民人焉盍究本

始惟敘惟修誰實介止酒旨且多盛德宜配

亞終獻咸甯太簇宮 以引以翼來處來燕豆籩牲牢有楚有踐

庸荅神休神亦錫羨土穀是依成此疇獻

徹豐甯應鐘宮 文治修明相成田功功為特殊儀為特隆終如

其初誠則能通明神毋忘時和歲豐

送神鎮甯林鐘宮 不屋受陽國所崇敬以興來歲苞秀堅穎雲

駟莫駐神其諦聽景命有僕與國同永

望瘞肅甯太簇宮 雅奏肅甯繁釐降格篚厥元黃丹誠烜赫肇

祀以歸瞻言咫尺萬年攸介丕承帝德

先農樂章

降神鎮甯八成林鐘宮二成 民生斯世食為之天恭惟大聖盡

心于田仲春勸農明祀吉蠲馨香感神用祈豐年 太簇角二

成 耕種務農振古如茲爰粒烝庶功德茂垂降嘉奏艱國家

攸宜所依惟神庸潔明粢 姑洗徵二成 俶載平疇農功肇



敏于耦耕耘同徂陞畛田祖丕靈為仁至盡豐歲穰穰延洪有  
引 南呂羽二成 羣黎力耕及茲方春維時東作篤我農人  
我黍既華我稷宜新由天降康永賴明神

初獻盥洗肅甯太簇宮 河酌行潦真足為薦奉茲潔清神在乎  
前分作甘霖沾溉芳甸慎於其初誠意攸見

升壇降同肅甯應鐘宮 有椒其馨維多且旨式慎爾儀降登庭  
止黍稷稻粱民無渴飢神嗜飲食永綏嘉祉

正配位奠玉幣億甯太簇宮 奉幣惟恭前陳嘉玉聿昭盛儀肅  
雝純如南畝深耕麻麥禾菽用祈三登膺受多福

司徒奉俎豐甯太簇宮 奉牲孔嘉登俎豐備地官駿奔趨進光  
輝肥碩蕃孳歆此誠意有年斯今均被神賜

正位酌獻保甯太簇宮 寶壇巍煌神應如響備膺咸有牲體茲

芳洋洋如在降格來享秉誠罔怠羣生瞻仰

配位酌獻保甯太簇宮 酒清斯香牲碩斯大具列觴俎精意先  
會民命惟食稗莠毋害我倉萬億神明攸介

亞終獻咸甯 宮 至誠攸感肸蠁潛通百穀嘉種爰降時豐  
祈年孔夙稼穡為重俯歆醴齊載揚歌頌

徹豐甯應鐘宮 有來雍雍存誠敢匱廢徹不遲靈神攸嗜孔惠  
孔時三農是宜眉壽萬歲穀成丕艾

送神鎮甯林鐘宮 焄蒿悽愴萬靈來俟靈神具醉聿吉旋歸歲  
豐時和風雨應期皇圖萬年永膺洪禧

望瘞肅甯 宮 禮成文備歆受清祀加牲兼幣陳玉如儀靈  
馭言旋面陰昭瘞集茲嘉祥常致豐歲

宣聖樂章 用宋大晟府釋奠舊曲惟邠國公沂國公增



迎神凝安九成黃鐘宮三成 大哉宣聖道尊德崇維持王化斯  
 文是宗典祀有常精純竝隆神其來格於昭盛容 大呂角二  
 成 生而知之有教無私成均之祀威儀孔時惟茲初丁潔我  
 盛柔永言其道萬世之師 太簇徵二成 巍巍堂堂其道如  
 天清明之象應物而然時維上丁備物薦誠惟新禮典樂諧中  
 聲 應鐘羽二成 聖王生知闡乃儒規詩書文教萬世昭垂  
 良日維丁靈承丕爽揭此精虔神其來享  
 初獻盥洗同安姑洗宮 右文興化憲古師經明祀有典吉日惟  
 丁豐犧在俎雅奏在庭周廻陟降福祉是膺  
 升殿降同同安南呂宮 誕興斯文經天緯地功加於民實千萬  
 世笙鏞和鳴柔盛豐備肅肅降登歆茲秩祀  
 奠幣明安南呂宮 自生民來誰底其盛惟王神明度越前聖柔

幣具陳禮容斯稱黍稷非馨惟神之聽

捧俎豐安姑洗宮 道同乎天人倫之至有享無窮其興萬世既

潔斯牲柔明醑旨不懈以忱神之來暨

文宣王酌獻成安南呂宮 大哉聖王實天生德作樂以崇時祀

無斃清醑惟馨嘉牲孔碩薦羞神明庶幾昭格

究國復聖公酌獻成安南呂宮 庶幾屢空淵源深矣亞聖宣猷

百世宜祀吉蠲斯辰昭陳尊簋旨酒欣欣神其來止

邠國宗聖公酌獻成安南呂宮 心傳忠恕一以貫之爰述大學

萬世訓彝惠我光明尊聞行知繼聖迪後是享是宜

沂國述聖公酌獻成安南呂宮 公傳自曾孟傳自公有嫡緒承

允得其宗提綱開蘊乃作中庸侑於元聖億載是崇

鄒國亞聖公酌獻成安南呂宮 道之由興於皇宣聖惟公之傳



人知趨正與饗在堂情文斯稱萬年承休假哉天命

亞終獻文安姑洗宮 百王宗師生民物軌瞻之洋洋神其甯止

酌彼金罍惟清且旨登獻惟三於嘻成禮

飲福同盟洗樂釋奠親祀用之攝祀不用而外路州縣則竝用之

徹娛安南呂宮 犧象在前豆籩在列以享以薦既芬既潔禮成

樂備人和神悅祭則受福率遵無越

送神凝安黃鐘宮 有巖學宮四方來崇恪恭祀事威儀雍雍歆

茲惟馨飈馭回復明禋斯畢咸膺百福

望瘞樂同盟洗

新擬釋奠樂章

迎神文明 天縱之聖集厥大成立言垂教萬世準程廟庭孔碩

尊俎既盈神之格思景福來竝

盥洗昭明 神既甯止有孚容若罍洗在庭載盥載濯匪惟潔脩

亦新厥德對越在茲敬恭惟則

升殿降同景明 大哉聖功薄海內外禮隆秩宗光垂昭代陟降

在廷攝齊委佩莫不肅雝洋洋如在

奠幣德明 圭衮尊崇佩紳列侑籩豆有楚樂具和奏式陳量幣

駿奔左右天睠斯文絜神之祐

文宣王酌獻誠明 惟聖監格饗於克誠有樂在縣有碩斯牲奉

醴以告嘉薦惟馨綏以多福永底隆平

兗國公酌獻誠明 潛心好學不違如愚用舍行藏乃與聖俱千

載景行企厥步趨廟食作配祀典弗渝

郝國公酌獻

沂國公酌獻



鄒國公酌獻誠明 洙泗之傳學窮性命力距楊墨以承三聖遭  
時之季孰識其正高風仰止莫不肅敬

亞終獻靈明 廟成翼翼祭祀孔時三爵具舉是饗是宜於昭聖

訓示我民彝紀德報功配於兩儀

送神慶明 禮成樂備靈馭其旋濟濟多士不懈益虔文教茲首

儒風是宣佑我皇家億載萬年

三皇樂章

降神九成咸成黃鐘宮三成 於皇三聖神化無方繼天立極垂

憲百王聿崇明祀率由舊章靈兮來下休有烈光 賓成大呂

角一成 帝德在人日用不知神之在天矧可度思辰良日吉歲

事有儀感以至誠尙右享之 顧成太簇徵二成 大道之行

肇自古先功烈所加何千萬年是 尊是奉執事孔虔神哉沛兮

冷風馭然 臨成應鐘羽二成 雅奏告成神斯降格安安有

位清廟奕奕肸鬯潛通豐融烜赫我其承之百世無斃

初獻盥洗蠲成姑洗宮 靈旂戾止式燕以甯吉蠲致享惟寅惟

清挹彼注茲沃盥而升有孚容若交于神明

升降恭成南呂宮 齋明盛服恪恭命祀洋洋在上匪遠具邇左

右周旋陟降庭止式禮莫愆用介多祉

奠幣祗成南呂宮 駿奔在列品物咸備禮嚴載見式陳量幣惟

茲篚實肅將忱意靈兮安留成我熙事

捧俎闕姑洗宮 我祀如何有牲在滌既全且潔爲俎孔碩以將

以享其儀不忒神其迪嘗純嘏是錫

太皞伏羲氏酌獻闕南呂宮 五德之首巍巍聖神八卦有作誕

開我人物無能稱元酒在尊歆監在茲惟德是親



炎帝神農氏酌獻闕南呂宮 耒耜之利人賴以生鼓腹含哺帝力難名欲報之德黍稷非馨眷言顧之享于克誠

黃帝有熊氏酌獻闕南呂宮 爲衣爲裳法乾效坤三辰順序萬國來賓典祀有常多儀具陳純精邕達匪藉彌文

配位闕南呂宮 三聖儼臨孰侑其食惟爾有神同功合德丕擁靈休留娛嘉席歷世昭配永永無極

亞終獻闕姑洗宮 緩節安歌載升貳觴禮成三終申薦令芳凡百有職罔敢怠違神具醉止欣欣樂康

徹闕南呂宮 籩豆有踐殷薦亶時禮文疏洽廢徹不遲慎終如始進退無違神其祚我綏以繁釐

送神闕黃鐘宮 夜如何其明星煌煌靈逝弗留飈舉雲翔瞻望靡及德音不忘庶回景貺發爲禎祥

望瘞闕姑洗宮 工祝致告禮備樂終加牲兼幣訖蕤愈恭精神

斯罄惠澤無窮儲休錫美萬福來崇

元樂惟郊祀天地祭宗廟祀先聖用雅樂曲宴用細樂胡樂駕行前部用胡樂駕前用清樂大樂雲和署掌大樂鼓板杖鼓箏篪龍笛琵琶箏箏七色興和署掌妓女雜扮隊戲祥和署掌雜把戲儀鳳司掌漢人回回河西三色細樂其有達鞞樂曲亦用箏箏琵琶胡琴火不思諸器而與漢人曲調不同其大曲 哈八兒禿 口温 也葛儻兀 畏吾兒 閔古里 起土古里 跋四土魯海 舍舍彌 搖落四 蒙古搖落四 閃彈搖落四 阿耶兒虎 桑哥兒苦不丁江南謂之孔雀雙手彈 荅罕謂之白翎雀雙手彈 苦只把失品絃 小 曲阿厮闌扯彌四蓋曲雙手彈 阿林捺花紅 哈兒火赤哈赤墨雀兒叫 洞洞 伯 曲律買 者歸 牝疇兀兒 把擔葛失 削浪沙 馬哈



相公 仙鶴 阿下水花

回回曲 伉里 馬黑某當當 清泉當當

論曰元時國人之文學不及金故其於禮樂尚不及金之備也蓋自有國俗其儀衛輿服亦一時觀美而已非其意之所屬也故不再錄輿服志而樂舞亦非其所制也雖然世祖知愛人英宗天性孝敬其庶幾乎有本者乎是宜可與言禮樂而終格焉不相洽况乎強所不欲者乎是許衡所謂萬年國俗而欲改從亡國之習者也焉可得哉

門人申憲文 刊

門人曾 謙襄校

門人曾士琮詳校

元書卷十九

元書卷二十

邵陽曾廉撰

郊祀志第五

記曰惟聖人爲能饗帝惟孝子爲能饗親祭如在祭神如神在子曰吾不與祭如不祭故禮云禮云玉帛云乎哉樂云樂云鐘鼓云乎哉漢大中大夫賈誼上書請改正朔易服色興禮樂孝文帝謙讓弗違非徒謙讓爲也懼匪其實不足以勝其文也自三代既遠王者安居深宮純以法爲治其精意弗格於上下於是寢泰而怠天子不能躬祭祀而方士術人以事鬼神進禮未具於郊廟反東封西祀好靈怪而厭經常迂詩書古文而安世俗之陋往往然也元興於三河代常拜天衣冠尙質祭器尙純帝后親之宗戚助其祭蓋匈奴之俗歲有三龍祠祭其先天地鬼神因大會其屬所從



來遠矣太祖初平朔漠遂征西域追逐滅里汗踰鐵門關駐於雪山以郭寶玉言封崑崙山元極王錫大鹽池名惠濟王大鹽池者雷翥海也是時方召處士邱處機於甯海處機先語於人以爲天使且召我歷四載乃至雪山太祖於是錫之虎符副以璽書不斥其名曰神仙而已然處機能導太祖以敬天愛民不嗜殺非徒方士言祭祀致福之術者也太宗繼世既平金南京首敕修孔子廟而史失載諸饗祀事定宗三年春釋奠於孔子頒胙憲宗二年秋八月庚申拜天於日月山漸有意於議禮制度矣其月癸亥又以孔子孫元措言合祀昊天土始作牌位以成吉思皇帝太上皇也可那顏配饗天地始大合樂祭後二年會諸王於顯顯腦兒之西閱歲駐於軍腦兒皆祭天而其禮最重灑馬湏云灑馬湏者用馬一羊八幣九匹又白羊毛纏若穗者九貂皮三遣官告天而以

巫覡呼成吉思名而祝之以用馬湏故曰灑馬湏也其後世祖卽位於燕京建元爲中統元年秋七月丁丑始設先世神位於中書省用登歌樂遣必闡赤致祭焉十一月命且製太廟禮器法物然未有太廟也二年親帥師如漠北則以夏四月乙亥祭天於舊桓州之西北如憲宗之禮其後則每幸上都輒以八月二十四日行焉爲故事矣祭天桓州之秋奉遷祖宗於聖安寺藏於瑞像殿仍寓中書省而遣使持香幣祀嶽瀆冬復遣道士訾洞春代祀東海廣德王廟有事於山川百神寢廣矣初吐蕃僧八思巴謁世祖於潛藩及踐祚以爲國師亦復號帝師於是僧徒寢盛歲時輒以祝釐祈福號爲好事名目繁矣三年之冬敕聖安寺作佛頂金輪會國師所名會之一也明年始詔建太廟制自皇祖以下皇伯考一太上皇及皇伯考二皇兄二皆以妣配定爲七室室以西爲上至



元二年乃命滌養太廟犧牲取大樂工於東平預習禮宜冬十月時享始尊皇祖爲太祖其明年太廟成丞相安童伯顏等上言祖宗世數尊諡廟號配享功臣增祀四世各廟神主七祀神位法服祭器等事皆宜以時定於是乃命平章政事趙璧等集議製尊諡廟號定爲八室烈祖神元皇帝皇曾祖妣宣懿皇后爲第一室太祖聖武皇帝皇祖妣光獻皇后則第二室次太宗英文皇帝皇伯妣昭慈皇后次皇伯考朮赤皇伯妣別土出迷失次皇伯考察合台皇伯妣阿昔倫次皇考睿宗景襄皇帝皇妣莊聖皇后次定宗簡平皇帝欽淑皇后次憲宗桓肅皇帝貞節皇后十月奉安神主於祔室歲用冬祀如初禮而功臣配享事未行也明年乃定歲月薦時新物孟春以鮪野兔仲春以雁天鵝季春以葑韭鴨雞卵孟夏以冰羔羊仲夏櫻桃蒲竹之筍羊季夏瓜豚大麥飯小麥麩

孟秋雞雞仲秋菱芡栗黃鼠季秋梨棗黍粱鷓老孟冬芝麻兔鹿稻米飯仲冬麕野馬季冬鯉黃羊塔刺不花逾歲時享命國師僧薦佛事於太廟七晝夜始造木質金牌位十有六設方榻金倚奉安祔室前自是佛事歲以爲常矣七年復敕宗廟祝文易以國書而諭歲享以野豕代豢豕無用犧牛其後數年始復用牛云其後奉禮郎申屠致遠言竊見木主旣成又有金牌位其日月山神主及中書設祭神主奉安無所博士議合存祔室栗主其舊置俱可隨時瘞埋不致神有二歸太常以聞制曰其與張仲謙諸老儒共議之其後以平宋遣官告祭祖宗於上都之近郊遣太常以銅爵二豆二上獻太廟於是天下清晏江南定矣明年乃詔重建太廟博士李天麟議一曰都宮別殿之制周之宗廟韋元成以爲七廟劉歆以爲九廟先儒多是劉歆二曰同堂異室之制起自後漢明



帝其後章帝亦復如之後世遂不敢加然先儒朱熹以爲不安十  
七年太廟成竟用後議前廟後寢廟爲七室於是翰林承旨和禮  
霍孫以祔室栗主八位竝日月山聖安寺牌位俱遷又率百官奉  
太祖睿宗二室金主於新廟太祖主仍題成吉思皇帝睿宗主仍  
題曰太上皇也可那顏皇后皆題名諱云於是舊廟毀焉乃大享  
其牲牛一用騂有副羊用白豕用黑鮮麋兔鹿天鵝野馬塔刺不  
花野雞鷓鴣黃羊胡塞兒湏乳蒲桃酒之屬皆具器用鼎俎尊彝登  
鉶籩豆簋盞於是爵有白玉碧玉水晶盞有白玉碧玉又益以江  
南所獲玉爵及玷凡四十九事納於太廟樂用宮縣登歌文武舞  
備禮爲盛矣其後皇太子薨命別立廟冬享送白馬一數歲又命  
祔於太廟而國俗割牲奠馬湏蒙古巫祝以國語致辭呼累朝帝  
后名而告之禮畢復以其餘撒於南櫺星門外名曰拋撒茶飯其

禮尤重於三獻云然世祖居漢地久益習中國諸祀事亦頗嚮儒  
術於是制天子親遣使致祭者三曰社稷曰先農曰宣聖自至元  
七年敕歲祀太社太稷其後建壇於和義門內土如四方色用青  
赤白黑而上覆以黃土社主用白石稷不用主配位后土氏后稷  
氏神位版二用栗素質墨書而樹松於壇南有玉幣牛一有副羊  
野豕各四其祭先農壇在藉田內歲以仲春上丁或辛甲日如祭  
社稷之禮宣聖歲以春秋仲月上丁釋奠堂上配饗二東西廡列  
從祀牲用牛一羊五豕五祭器如禮三祀樂章皆具禮樂志云其  
時郡縣亦通祀社稷宣聖及三皇廟而嶽鎮海瀆之祀歲以正月  
如東方土王日泰山祀泰安沂山祀益都立春東海祀萊州大淮  
祀唐州三月南方土王日會稽立夏衡山皆遙祭河南府界立夏  
復遙祭南海大江於萊州六月中央土王日嵩山祀河南霍山祀



平陽七月西方土王日華山祀華州吳山祀隴縣立秋祀大河竝  
遙祭西海皆於河中界十月北方土王日恆山祀曲陽醫巫閭祀  
廣甯立冬濟瀆祀濟源而北海遙祭登州其後平宋罷諸遙祭惟  
西北海不改云其後天子言五嶽四瀆朕宜親祠而道遠不可其  
遣重臣漢人選名儒及道士習祀事者代之於是東嶽天齊仁聖  
帝加號大生南嶽司天昭聖帝加大化西嶽金天順聖帝加大利  
北嶽安天元聖帝加大貞中嶽中天崇聖帝加大甯五嶽歲祀銀  
香合一組金幡二鈔五百貫江瀆廣源王加號順濟河瀆靈源王  
加宏濟淮瀆長源王加溥濟濟瀆清源王加善濟四瀆各織金幡  
二鈔半五嶽四海東海廣德王加號靈會南海廣利王加靈孚西  
海廣潤王加靈通北海廣澤王加靈佑四海五鎮各銷金幡二鈔  
同四瀆其冬天子授吃刺思八斡節爲帝師僧羅藏等作佛事坐

靜於聖壽萬安涿州寺等所凡五十度遣真人張志仙持香詣東  
北海嶽濟瀆致禱而敕建后土太甯宮又立后土廟於臨汾上都  
新造始立城隍廟逾歲又封大都城隍爲祐聖王又以神祐封昔  
木土山爲武定公泉爲臨淵侯又加封回水窩淵聖廣源王曰善  
祐常山靈源昭應王曰廣惠安邱雹泉靈霈侯爲靈霈公其後又  
加封桑乾河洪濟公曰顯應又封小清河神爲洪濟威惠王又嘗  
命中使咬難歷江南名山訪求高士且命持香幣詣信州龍虎山  
臨江閣阜山建康三茅山皆設醮焉又嘗修南嶽南海祠桐柏山  
修淮瀆祠河中建西海祠竝河瀆廟又築昭應宮於高粱河以祀  
河神諸天神風師以立春後丑日祀東北郊雷雨師以立夏後申  
日祀東南郊又敕以分至及聖誕日祭星於司天臺其後又命有  
司祭斗命元教宗師張留孫置醮祠星三日留孫者正一天師張



宗演之弟子平宋之歲從宗演入見善祠禱之術者也事在其傳中其時張易言高和尚有秘術能役鬼爲兵制敵人命天子命和禮霍孫與同將兵北邊試焉初太保劉秉忠亦稱有秘術曰役使鬼神惟太一六丁乃爲作祠於宛平西山號曰靈應萬壽宮其後賜太一真人李居壽第曰太一廣福萬甯宮以祀六丁又以月直元辰敕居壽祠奏赤章於天凡五晝夜又命其弟子李全祭斗以祈福又召法師劉道真問祠太一法歲屢祀焉然諸處陰陽人祭星則竝禁云而盤古王祠會川伏羲女媧堯舜禹湯立廟於河中解州洪洞河東又封伯夷昭義清惠公叔齊崇讓仁惠公天子以爲三代以來開國之主皆以功及萬世澤被生民故歷代祀典不廢宣令所在三年致祭竝支鈔二十兩歸德微子彭城張良諸賢係自古忠義直烈以誼型後世激厲人臣者甚大令所在人民歲

時致祭其祠又敕春秋二仲上丙日祀帝堯然廟貌始自真人姜善信請也其時又加封泉州女神靈惠夫人曰廣祐明著天妃以護海運故其廟在直沽平江周涇泉福興化歲遣使賫香及金幡一合銀一錠有司以柔毛酒醴將事又建漢祖天師正一祠於兩都又封磁州崔府君爲齊聖廣祐王崔府君名子玉世俗傳稱唐太宗時爲長子令有惠政能以牒攝虎沒而祀以爲神者也世祖頗徧及羣祀其後三十一年崩而郊禮未備成宗立夏遣司徒兀都帶平章政事不忽木左丞張九思爲大行皇帝請諡於南郊於是追尊皇考明孝太子爲皇帝廟號裕宗其歲開醮祠於壽甯宮祭太陽太歲火土等星於司天臺祭紫微星於雲仙臺故事西僧作佛事釋罪人以祈福謂之禿魯麻其歲有奴殺其主而妻殺夫者西僧旣大受賂則請被以帝后御服乘黃犢出宮門曰禿魯麻



元書 卷二十一  
也不忽木曰人倫者王政之本風化之基也亂法如是耶帝以責丞相完澤曰朕戒汝毋使不忽木知而使朕愧之也然國俗實崇信焉明年元貞元年以國忌飯僧七萬於大聖壽萬安寺言爲世祖資冥福然太廟玉冊玉寶成省臣請帝納諸各室帝躬祝冊命獻官導迎入廟而已其秋詔易江南天慶觀爲元妙觀毀所奉宋太祖神主冬遣集賢院使阿里渾撒里祭星於司天臺又授嗣漢三十八代天師張與材太素凝神廣道真人管領道教如故其時海潮齧鹽官岸圯與材以術治之雷震而有物魚形龜首磔於水裔云是時命郡縣通祀三皇如宣聖釋奠禮然皆主以醫師大德元年太保月赤察兒奏廟享增用馬從之而詔以嶽鎮海濱天子所尊禮非諸王駙馬得擅祀也明年復以至元中封號未及五鎮於是加號沂山東安王曰元德會稽順應王曰昭德吳山永靖王

曰成德醫巫閭廣甯王曰貞德霍山靈應王曰崇德逾年復加解州鹽池神惠康王號曰廣濟資寶王曰廣澤及封浙西鹽官州海神曰靈感宏祐公吳大夫伍員曰忠孝威惠顯聖王其後又封真武神爲元聖仁威元天大帝尊稱至天帝矣然詔畏吾兒僧陰陽巫覡道人呪師自今有大祠禱必請而行違者罪之非不嚴忌祀事也自世祖未嘗親郊廟成宗滋多病於是始議建南郊翰林國史院檢閱袁桷進十議以爲天無二日天旣不得有二五帝不得謂之天作昊天五帝議祭天歲或爲九或爲二作祭天名數議園邱不見於五經郊不見於周官作園邱非郊議后土社也作后土卽社議三歲一郊也作祭天無閒歲議燔柴見於古經周官以禋祀爲大義各有指作燔柴泰壇議祭天之牛角繭栗用牲於郊牛二合配而言之增羣祀而合祠非周公之制矣作郊不當立



從祀議郊質而尊之之義也明堂文而親之之義也作郊明堂異制議郊用辛魯禮也卜不得常爲辛作郊非辛日議北郊不見於三禮尊地而建北郊鄭元之說也作北郊議禮官推其博頗采用焉六年始遣右丞相合剌合孫合祭昊天上帝皇地祇五方帝於南郊其歲太廟災春霜殺麥秋雨害稼數年災異見於是合剌合孫言去年地震星變雨澤愆期歲比不登案祈天所以保民天子宜親祀者三日天曰祖宗曰社稷祭天國之大事也宜如禮於是復召集議者三翰林集賢太常定議園邱惟祀昊天上帝而無主然仍攝祀而已自從祀受胙外儀注悉用唐制修之而設郊祀署令丞各一人及太祝奉禮協律郎法物庫官焉其歲乃築壇於麗正門之南丙位遂祀昊天上帝於南郊復以右丞相合剌合孫爲太尉及左丞相阿忽台御史大夫鐵古迭兒備三獻牲用馬一蒼

犢一羊豕鹿各九其文舞曰崇德之舞其武舞曰定功之舞而省配天祖宗之位蓋中書以爲宗廟已依時祭享也其後武宗卽位首加號先聖曰大成至聖文宣王而命御史大夫鐵古迭兒知樞密院塔魯忽古平章政事牀兀兒告謝天地及社稷南郊始作神主木用柏素質元書其後太常禮官言別立北郊祭皇地祇南郊以太祖配北郊以世祖配帝是之旣而太尉尙書右丞相脫虎脫太保左丞相三寶奴司徒田忠良參政郝彬等議北郊方邱朝日夕月禮方邱宜以嶽鎮海瀆山林州澤邱陵墳衍原陞各就其方從祀於是太常禮儀院下檢討合用諸物十一月丙申有事於南郊而以天皇太帝五方帝日月星辰從祀是歲始以太祖配天其牲正配位蒼犢各一五帝各犢一皆如其方色大明犢以赤夜明犢以白馬一羊鹿野豕各十有八兔十有二皆有圭幣尊罍俎登



籩豆簠簋郊之夜用銷金絳紗籠椽燭然其後北郊日月竟未施行其時已追尊皇考爲皇帝廟號順宗於是太廟七室以太祖居中睿宗世祖裕宗西順宗成宗東逾歲乃以受尊號親謝太廟其歲又請太祖睿宗尊諡於天請光獻莊聖皇后於廟其冬始親享太廟奉玉冊玉寶加號太祖聖武皇帝曰法祖啟運光獻皇后曰翼聖睿宗景襄皇帝曰仁聖莊聖皇后曰顯懿廟亦皆範金爲之而藏舊製金表神主於櫝初元故事天子未嘗詣太廟寢以爲常於是大司徒宦官李邦甯諫曰先朝以疾廢享祀非不欲躬親也繼承之初正宜開彰孝道以率天下躬祀太廟以成一代之典循習故弊非臣所知也帝稱善卽日備法駕宿於齋宮禮畢執事人各賜散階一等又賜太廟禮樂戶鈔帛有差其時以皇太子言薦新宜用影堂器物羔羊炙魚饅頭饌子西域湯餅圓米粥沙糖飯

羹每月用以配薦明年三寶奴田忠良等復言太廟故用瓦尊乞代以銀從之仁宗之世太廟祔武宗爲七室諸祠祀皆如故其時太常寺臣復請建北郊不允而命許衡從祀孔廟又以郟國公曾子沂國公子思增入配饗又封孟子父爲邾國公於是樂章十有六矣尋命河南建丞相阿朮祠堂又敕衛輝昌平修殷比干唐狄仁傑祠又封楚屈原忠節清烈公用褒遺忠也已而英宗嗣立仁宗升祔將增置廟室太常禮儀院諸禮官集議以爲古者天子祭七代兄弟代數同今七室皆有神主大行皇帝宜權於武宗室南結綵爲殿以奉神主於是天子以卽位躬謝太廟先日御齋宮其日法駕至櫺星門止有司進輦不御步至大次禮儀使請署祝版帝降坐正立書名及讀祝復敕高贊至仁宗室輒獻歔流涕左右皆感動焉明年至治元年正月帝始服袞冕親享太廟以左丞相



拜住知樞密院曲樞亞終獻禮成天子坐大次謂羣臣曰朕纘承祖宗不緒夙夜祇懼無以報稱歲惟四祀而使人代之所未安也自今歲必親祀以終朕身其冬又以受尊號躬謝太廟賜與祭者帛普減內外官吏一資二年正月帝服通天冠絳紗袍出崇天門致齋大次行酌獻禮中外肅然矣於是拜住率百僚稱賀於大明殿賜執事金帛有差拜住又奏建太廟前殿議行禘祫配享之禮其歲三月竟以新作太廟命權止夏秋二祭五月帝幸五臺山滎星焉其歲封漢諸葛忠武侯爲威烈忠武顯靈仁濟王九月平章政事瑪魯中丞曹立禮部尙書張埜學士蔡文淵太常禮儀院使王緯田天澤博士劉致都堂會議南郊事一曰南郊三年一行二曰神位定曰昊天大帝三曰配位以太祖皇帝四曰告配用牛五曰祭服以大裘冕六曰爵正位用匏配位飲福用玉七曰前期十

日親戒百官管勾代太尉讀誓刑部尙書涖之八曰散齋四日於別殿致齋三日於大明殿九曰席正位藁秸配位蒲越冒以青綾褥青錦方坐十曰牲用蒼犢二羊豕九馬純色肥腩一鹿野羊豕皆十八十一曰香鼎陶瓦五十二曰割牲用國禮十三曰大次小次皆在廟垣西又續具議一曰玉不燔二曰飲福在一獻畢三曰樂六變而燔牲首祭終以爵酒饌物及牲體燎於壇天子望燎柴用柏四曰儀注與唐制參酌損益修之其禮蓋多仍武宗時故事云尋以太皇太后崩南郊事復止而有司以太廟祀事在國哀旬有二日內爲言制曰太廟禮不可廢迎香去樂可也又言太廟興功未畢有妨宮縣請止用登歌從之當是時天子方有意於興禮樂丞相拜住亦力贊助焉而南坡禍作矣然帝實崇信別氏仁宗喪卒哭大作佛事又詔祭遁甲神於香山尋詔郡縣作帝師八



元書 卷二十一  
思巴殿視孔子廟有加焉泰定帝嗣位卽遣使詣曲阜以太牢祀孔子而追尊皇考晉王爲皇帝廟號顯宗盜竊仁宗及武宗金主竝更作焉明年泰定元年大行皇帝升祔廟號英宗其時博士劉致議曰周制天子七廟三昭三穆昭東穆西所以別父子親疏之序而使不亂也聖朝取唐宋之制定爲九世遂以舊廟八室而爲六世昭穆不分父子竝坐不合禮經新廟之制一十五閒東西二閒爲夾室太祖室旣居中父爲昭子爲穆則睿宗當居太祖之東裕宗當居睿宗之東武宗仁宗兄弟共爲一世又當居裕宗之東皆爲昭世祖當居太祖之西成宗顯宗共爲一世居世祖之西皆爲穆如此則秩然有序矣若以累朝定制依室次於新廟則顯宗躋順宗之上順宗又躋成宗之上案春秋閔公無子庶兄僖公代立其子文公躋僖公而上之史稱逆祀僖公猶有位之君尙

不可居故君之上况未嘗正位者乎省臣是其議更議以英宗祔成宗室之西帝皆從之凡爲十室其時帝命祀遁甲五福神而繪八思巴像頒諸行省又遣使代祀嶽瀆名山大川又加封廣德路祠山神張真君曰普濟甯國路廣惠王曰福祐温州故平陽侯曰英烈廬陵江神曰顯應幸淵龍神曰福應昭惠公蒙山神曰嘉惠昭應王洞庭神曰忠惠順利靈濟昭佑王烏龍山神爲忠顯靈澤普佑孚惠王又遣使祀宅神於北部行幄遣使代祀龍虎武當山竝降香於三茅閣阜又祭五福太一神命道士焉又加封唐柳宗元文惠昭靈公又置諫議書院於昌平祀唐劉蕡置橫渠書院於郿祀宋張載然帝以英宗好言禮而不終意寢怠郊廟皆大臣攝祀事是時御史趙師魯言天子親祀郊廟所以通精誠迓神釐生蒸民阜萬物百王不易之禮也宜講求故事對越以格純嘏帝不



允以爲遵世祖舊制也太常院臣知其意乃奏言先帝始復古制太廟一歲四祭世祖以來歲惟一享請裁擇之帝曰祭祀大事也朕何敢簡焉故祭有其舉之莫敢廢也致和元年詔舜禹廟悉依舊祠故事歲以春秋仲月上旬卜日有司蠲潔致祭官給祭物已而文宗得位其年卽改天祿元年首立太禮院以奉祖宗神御殿祠祭加封漢前將軍關羽爲顯靈義勇武安英濟王遣使祠其廟十月從禮官言卽位之始當告祭郊廟社稷乃詔改時享用仲月是月卽毀顯宗廟室十一月宿齋宮服袞冕享於太廟以禮成御大明殿受朝賀明年四月復時享於太廟其歲明宗卽位文宗爲皇太子旋復自立詔加封大都城隍爲護國保甯王明年五月幸大聖壽萬安寺作佛事至順元年三月明宗升祔序英宗上八月以世祖是月生命京師僧百七十人作佛事十月始親祀上帝於

南郊以太祖配帝展轉自南裔遽負斧屨以爲天助於是益嚴於鬼神之祀自英宗有志親郊而大禮未遂至是典禮文物居然詳備矣其時命祭周文王於羗里祠祭周文憲王於岐陽書院而額夷齊廟曰聖清歲春秋祀以少牢又加封孔子父齊國公叔梁紇爲啟聖王顏子兗國復聖公曾子郕國宗聖公子思沂國述聖公孟子鄒國亞聖公河南伯程顥豫國公伊陽伯程頤洛國公又命建孔子廟於後衛建顏子廟於曲阜陋巷立閔子書院於濟南以董仲舒從祀孔子廟又封秦蜀郡太守李冰爲聖德廣裕英惠王二郎英烈昭惠靈顯仁祐王二郎者冰子也又謚漢長沙王吳芮爲文惠王唐司徒顏真卿曰貞烈文忠公天子向重國俗於是封蒙古巫所奉神爲靈感昭應護國忠順王號其廟曰靈佑又命西僧崇星而歲以孟冬祀五福十神太一眞君尋敕每歲四祀焉又



元書 卷二十一  
創建五福太一宮於京城乾隅又祭遁甲神於南屏及西山又遣  
秘書太監王珪等代祀嶽鎮海瀆后土三年封顏子父曲阜侯無  
繇爲杞國公謚文裕而割益都鄒縣散地三十頃徵其歲入給顏  
子祀其歲太常博士王瓚言郡縣所請加神廟號濫及淫祀按禮  
經以勞定國以死勤事能御大災捍大患則祀之其非在祀典之  
神今後乞不加封制曰可其後甯宗立俄而崩順帝立元統二年  
四月文宗升祔太廟行祭告禮臺官言因有事於太廟帝從之而  
罷時享其明年升祔甯宗而文宗神主以地震碎命修理焉而祭  
告如禮其後後至元三年詔封晉郭璞爲靈應侯謚唐杜甫爲文  
貞其歲又加封文始尹真人爲無上太初博文文始眞君徐元垂  
元感聖慈化應御眞君庚桑子洞靈感化超蹈混然眞君文子通  
元光暢昇元敏秀眞君列子冲虛至德遁世游樂眞君莊子南華

至極雄文宏道眞君間歲又加封瀏陽道吾山龍神崇惠昭應靈  
顯廣濟侯又加孝女曹娥爲慧感靈孝昭順純懿夫人明年詔以  
文宗謀爲不軌致皇考飲憾上賓命撤廟主而奉玉冊玉寶加尊  
明宗親祿太室其歲封微子仁靖公箕子仁獻公比干仁顯忠烈  
公又加封漢張飛武義忠顯英烈靈惠助順王明年至正元年改  
封徽州土神汪華昭忠廣仁武烈靈顯王其後數歲復詔禁淫祀  
十年江西湖東廉訪使文殊訥言三皇開天立極功被萬世而每  
歲命太醫官主祭揆禮未稱請如宣聖廟釋奠禮而遣中書省臣  
代祀從之於是禮樂始備帝爲降御香中書擬三獻官將事宣徽  
供禮饌光祿供內醞太府供金帛廣源庫供薌炬大興尹供棗盛  
犧牲制幣殺核執事官竝以清望充矣其後二十年加封福建鎮  
閩王爲護國英仁武烈忠正福德鎮閩尊王明年以黃河清遣官



祀河神焉帝在位久耽酒色凡親祀南郊者二親祀太廟者三而太廟歲四祭或減其一或減二徹里帖木兒至以星變議罷科舉竝減四祭爲一云其後御史言五行傳曰簡宗廟廢祭祀則水不潤下近來雨澤愆期四方多旱而歲減祀事變更成憲原其所致恐有感召蓋天子之職莫大於禮禮莫大於祭此宜通舊制也然四祭竟不舉其後詔復四祭以兵事竟未施行二十八年明兵至京師詔太常禮儀院使阿魯渾奉太廟列室神主與皇太子北行竟不果而元亡矣其累朝神御殿太祖太宗睿宗於大承華普慶寺世祖裕宗於大聖壽萬安寺成宗天壽萬甯寺順宗大永福寺武宗大崇恩福元寺仁宗亦於大承華普慶寺顯宗大天源延聖寺明宗與顯宗同文宗於大承天護聖寺或月四祭或歲春秋二祭遣翰林院官行禮焉其後顯宗文宗以撤廟享其神御殿皆罷

初世祖命鍊師王道歸於真定築道觀名玉華宮建孝思殿歲以忌日享祀太上皇皇后御容本路官吏祭奠祭用中統鈔一百錠皇慶二年用登歌樂行三獻禮其後至正三年方永貞言尙書云黷於祭祀時謂弗欽春秋之義父不祭於支庶君不祭於臣僕之家聖朝建立七廟崇奉孝享可謂至矣而玉華宮原廟列在郡國又非龍興誕降之地主之以臣僕之賤是非禮之甚者也時亦不能用大率元時惟重國禮自世祖時帝師八思巴置素段蓋於大明殿御座上歲以二月望建游皇城每出以漢前將軍關羽神像爲監壇儀仗之盛過於乘輿一時士女如雲帝及后妃公主亦於玉德殿外結金脊彩樓觀覽焉及罷帝師遂大作佛事以爲與眾生祓除不祥也而八思巴亦有影堂此其信尙殆可知矣論曰元人於天地祖宗皆強爲之禮耳其所崇重蓋別有在也世



祖崇儒術尚不躬親祀事况夫怠荒者乎然其後禮樂亦云備矣而祈禱之意二氏巫祝之言先入主之將所謂具文者乎故曰殺牛不如禴祭又曰典祀豐於昵元有之矣故詳著其事實而得失昭焉若夫儀注之目則籩豆之事太史公所不言者也故不敢復列於篇

申端笏

申秉堃

刊

門人曾 彬襄校

門人曾士琮詳校

元書卷二十一

選舉志第六

邵陽曾廉撰

皋陶謨載禹言光天之下至於海隅蒼生萬邦黎獻其惟帝臣惟帝時舉蓋伊古選舉之法始於此而考其法曰敷納以言明庶以功車服以庸是時文藝未興所謂言者當是殿廷占對之詞非試以文字而著之簡牘也然必其功著而後以車服命之非論篤是與矣又曰誰敢不讓敢不敬應帝不時敷同日奏罔功夫讓與應相距也而敷同至混也聖人若預知後世必有爭競及規避而泛以求人者此萬世人君之責所當為天下愛惜人才而不可以賢否雜糅者也夏殷之制不傳周人入學九年大成而三年大比然官由世族德若孔子亦復沈於下位其起自孤寒管夷吾甯戚百



里奚以外無聞焉漢武帝興而後表章六經立十四博士胄子萃萃焉又興廉舉孝設賢良方正之科而郡國復有辟舉以羅諸賢自是士有至守相公卿者矣然班固以爲漢業寢盛由設科射策勸以官祿而然也蓋人生而靜天之性也感於物而動性之欲也自非聖人孰能克全其性而不動於欲余考漢時學優而仕本自小吏幹佐方至文學功曹積以歲月乃得察舉秀異始爲公府所辟遷作牧守入作台司又或蒙特達之知或由任子入官以至九列而孝廉其常舉也文武同途儒吏並用法亦善矣哉至於唐宋選舉其時楊綰李栖筠沈既濟陸贄富弼宋祁歐陽修司馬光蘇軾朱熹楊萬里諸臣論之詳矣其中雖純駁不齊然非王安石蔡京之徒以公濟其私其餘亦未嘗不爲國家長進作人計也若唐代制科有道侔伊呂才膺管樂志烈秋霜辭標文苑文以經邦武

足安邊孝弟力田聞於閭里才識兼茂明於體用等目宋司馬光乞以十科用人曰行義純固可爲師表曰節操方正可備獻納曰智勇過人可備將帥曰公正聰明可備監司曰經術精通可備講讀曰學問該博可備顧問曰文章典麗可備著述曰善聽訟獄盡公得實曰善治財賦公私俱便曰練習法令能斷請讞宋之世雖不能如光所奏而唐則制科諸賢亦極天下之選然其問對論賦稀傳矣又元稹皇甫鏘亦與其間大率其所爲文度亦無以遠過於尋常得第者也而二代常舉則惟進士爲重而明經次之其被進士選者由學館曰生徒則昔之學校也由州縣曰鄉貢則昔之鄉大夫賓興也其後王安石變貢舉法廢儒先經說而用王氏學其後又詔取士皆從學校三舍並廢科舉法未幾科舉復舊而士皆趨學校蓋舍選尊而鄉舉卑舍選優而鄉舉額狹也遂至舉人



元書 卷二十一 選舉志 二  
以寄應興訟又復盛行懷挾排門大譟降及代替詐冒棄親匿服靡所不至又苟賤諛佞取合權門豈非徇利祿之欲使之然哉至制科以忤王安石絀罷進士以大璫小史充額而士不足以爲士矣自是以後制科及辟除皆不行而權臣惟以便己爲務大亂生天下夷狄矣蓋自漢後分取士官人爲二唐之時則取士在禮部官人在吏部官少才多無所位置至於積滯乃立循資格張奭用爲選首韓愈三試而絀故嚴則賢愚同滯寬則臧否混淆此敷同之弊也故方其靜也以漢高詔求賢而叔孫通不能致魯二生以孝武求可將相及使絕國而無有應詔至其動也則劉寔著崇讓論而不能止士之囂然則求其讓而復能應亦難矣哉亦以雄主不可以姑爲嘗試而通例則無不可以僥倖而得也夫生徒此人也鄉貢亦此人也進士此人也制科亦此人也鄉里舉選此人也

州郡辟舉亦此人也詩賦此人也策論經藝亦此人也謂爲無實而亦不可謂不獲得人之效矣竊獨善蘇軾之議貢舉也必歸之君相知人之明朝廷責實之政至其所試則謂詩賦策論均爲無用而莫之廢者祖宗以來以爲設法取士不過如此也然後知聖人以功證其言以車服酬其功爲天下士之不敢居而無不樂效其用也元興自龍沙當時在官皆罷貅熊虎之士長於治兵短於治民所得漢地皆以其人世爲諸侯守之使各辟用所屬而已其後太宗之世始設國子學總教及提舉官命侍臣子弟入學肄業其後數歲旣平金中書令耶律楚材乃請用儒術選士於是始命木虎乃及劉中以論經義辭賦試選諸路儒士除本貫議事官漸有意於甄拔人才矣其時楊奐以試爲河南徵收稅課長官其諸佐貳則招集一時名士也然國人實鄙夷漢法必欲破壞儒士進



元書 卷二十一  
用之例以奐爲耶律楚材所用也遂言楚材率用親舊必有二心矣太宗雖不從其言而試士竟罷其後十餘歲世祖卽位命宣撫司官舉文學才識可以從政及茂才異等列名以聞又詔立諸路提舉學校官又立孔顏孟三氏學詔曰孔氏顏孟之後皆聖賢之後也自兵亂以來往往失學甘爲庸鄙朕甚憫焉今以進士楊庸教授三氏子弟其務嚴加訓誨精通經術以繼聖賢之業明年詔諸路管民子弟有分管州府司縣及鷹房人匠諸事者罷之尋詔諸品官正從分等廕子各止一人至元元年竝罷諸路世守官而嚴於澄敘矣自木虎乃劉中試士後世祖命丞相史天澤條具當行大事以爲科舉當復四年學士王鶚請卽舉行天子命左三部與翰林議定程式而未果也明年遂定品官子弟傑直法逾年遂立國子學以隨朝百官近侍國人子孫及俊秀者充生徒而爲之

師者許衡王恂也七年又定諸路達魯花赤子弟承襲之法未幾天子復詔江南舊學田給以養士竝令諸路設立小學選老成之士爲教授諸官以教之其制見職官志或有開館延師及自承家學不至者亦不强也又若先儒過化之地名賢經行之所與多財好學之家出錢粟贍學者竝立爲書院而以山長主之是時國子學惟止三齋設博士通掌教事講授經旨是正音訓上嚴教導之術下考肄習之業復設助教正錄同相督課凡讀書必先孝經小學論語孟子大學中庸次及詩書禮記周禮春秋易名能養士然學官生徒皆寄寓他舍也衡恂又已物故於是秘書少監程鉅夫上疏曰臣聞國家天下必需才以爲用而人才之盛全在國家教育之勤其衰也反是參之歷代可考也國家自中統建元以來中外臣僚亦時聞表表偉傑者皆自往時故老宿儒薰陶浸灌而然



元書 卷二十一  
歷時既久以次淪謝臣不知十餘年後人物當復何如其瑣瑣也而主國是者習不知怪視學校爲不急謂詩書爲無用豈不罔哉臣愚欲望陛下明詔有司重學校之事慎師儒之選京師首善之區尤當興建國學選一時名流爲國人矜式外而名都大邑教官有缺不但尋常例取庸人而已必使廷臣推擇可爲人儀表者條具奏聞令有祿可養而不匱職比親民而加優視教化之興廢爲考第之殿最其諸生有經明行修者特予蠲免賦役庶國家教養有方多士鼓舞不倦天下幸甚當時鉅夫又言御史臺按察司並宜參用南北之人世祖亦嘉納之而國人不謂然也然國人雖憎儒術而不能廢吏事凡怯僻省院憲臺守令蔭子禮儀庫藏稅務軍官匠官壕寨官歲貢吏員省部令史譯史通事宣使奏差書史典吏控鶴傘子玉典赤及各投下皆有銓選一定之制其銓注遷

調減資升等守闕避籍照會程限公參給假就近考滿試驗或援例借資優升回降皆有常法從七品以下屬吏部正七品以上屬中書三品以上由中書取進止六品以下敕中書牒署之一品至五品爲宣授以制行之三品以下用金寶二品以上用玉有特旨則有告惟川蜀雲南湖廣諸官每三歲則遣使與行省銓注而以御史往蒞之國人所忌者不在此惟近侍爲人求官而已他無所爭也世祖在位三十餘歲和禮霍孫爲丞相上言天下習儒者少由刀筆得官者多不如開科舉則人自向學矣帝是其言會和禮霍孫罷相而止其後成宗立省臣上言近者阿合馬桑哥怙勢賣官不別賢否止憑解出遷調選法大壞其令廉訪司體察以聞省臺覈實定其殿最以明黜陟其臺訪官亦宜臺省同選爲宜從之是時吏道凡雜翰林學士王惲以爲當行貢舉因上疏曰貢舉之



道宜先選教官定所明經史爲所習科目以州縣大小限其生徒  
揀俊秀無玷污者充員數期以歲月使盡修習之道然後州縣察  
行考學貢於禮部經試經義作一場史試議論作一場廷試策兼  
用經史斷以己意以明時務如是則士無不通之經不習之史進  
退出舍一出於學既復古道且革累世妄舉之弊必獲實學適用  
之效矣帝亦不能行而其時合刺合孫爲丞相以國學藏息無所  
遂力任廟學事十年而廟成御史中丞何瑋因請建學廟側於是  
國子學生徒得安絃矣其後武宗之世省官言內降旨與官者八  
百八十八人已除三百人未議者已五百餘請自今越奏者勿予  
帝是之然帝以參虎人爲御史以角觚人及伶官領平章政事而  
名器猥褻極矣其時宰相至不可勝計後酌定爲十二人元代官  
人之濫未有甚於此時者也數歲仁宗立平章政事李孟言老成

凋謝宜訪四方名儒擢任國學翰林秘書太常或儒學提舉以示  
激勸帝命如言施行無限資格初仁宗在懷州深見吏弊及卽位  
欲痛剷除之李孟曰吏亦有賢者在乎變化激厲之而已帝曰卿  
儒者宜與此曹氣類不合而護之如此真長者言也因遂與孟論  
用人之方孟言漢唐宋金科舉得人爲盛語在孟傳維時皇慶二  
年帝遂下詔曰祖宗以神武定天下世祖皇帝崇學校爲育才之  
地議科舉爲取士之方朕祖訓是式惟取人莫先於德行試藝則  
取經術而詞章次之其令中書定其條例以皇慶三年八月天下  
郡縣興其賢能充賦有司次年二月會試京師中選者朕將親策  
焉而其程式每三歲一次開試蒙古色目人第一場經問五條大  
學論語中庸孟子內設問用朱氏章句集註第二場策一道問以  
時務漢南人第一場明經經疑二問設問書及所用註與蒙古同



元書 卷二十一 六  
復以己意結之又經義一道人各治一經詩主朱氏書主蔡氏易  
主程氏竝兼用古注疏春秋用三傳及胡氏禮記用古注疏第二  
場古賦詔誥章表內科一道古賦詔誥用古體章表四六參用古  
體第三場策一道問經史時務其舉人從本貫官司於諸色戶內  
推舉年及二十五以上必經明行修結罪保舉以禮敦遣其優倡  
之家及身犯姦惡者不得應試竝令憲臺官議濫舉及應舉不舉  
罪會試例如鄉試御試以三月試策一道其鄉試行省十有一凡  
蒙古取七十五人大都十五人上都六人河東真定東平遼陽河  
南陝西江浙各五人山東四人甘肅嶺北江西湖廣各三人四川  
雲南征東各一人色目七十五人大都江浙各十人湖廣七人江  
西六人山東真定河南各五人上都河東東平各四人四川陝西各  
三人嶺北遼陽甘肅雲南各一人征東一人漢七十五人大都十人上都四

人真定十一人東平河南各九人山東河東各七人四川陝西各  
五人雲南甘肅遼陽各二人嶺北征東各一人南人七十五人江  
浙二十八人江西二十二入湖廣十八人河南七人合三百人赴  
會試取中選者一百人蒙古色目漢南人各二十五人其監試考  
試彌封謄錄等官皆承宋制會試則有知貢舉同知貢舉官廷試  
則又有讀卷官榜發蒙古色目人爲右榜漢南人爲左榜第一名  
賜進士及第從六品第二三亦賜及第與二甲皆正七品三甲以  
下皆正八品二甲賜出身三甲賜同出身其蔭子及居官有品級  
人若蒙古色目人同漢南人試三場中選者均加一等注授既詣  
闕謝恩遂賜恩榮宴於翰林國史院押宴以省官凡預試官咸在  
竝簪花與宴復上謝恩表竝詣省參見又詣宣聖廟行舍菜禮第  
一人具祝文行事刻石題名於國子監是時天子又修有唐曲江



故事詔諸進士會飲積水潭假以內廷簾幕飲器天子攜皇后妃嬪公主帷樓而觀之以爲曠世盛典先是世祖旣立國子監又立蒙古國子學後生徒至百五十人竝置諸路蒙古字學以通鑑節要蒙古語言譯之又立回回國子學後至五十餘人以習亦思替非文字其國子監傳習經學後至三百二十人三學皆有蒙古色目漢南人百官子弟及凡民俊秀皆與其後至大中立試貢法試蒙古寬而授官六品色目稍密而授以正七品漢人則全用科場之制而授以從七品其後至延祐時又用集賢學士趙孟頫禮部尙書元明善議立升齋積分法是時國子監分六齋東西相嚮下左曰游藝右曰居仁凡誦書講說小學屬對者隸焉中左曰據德右曰志道講說四書課肄詩律者隸焉上左曰時習右曰日新講說易書詩春秋科習明經義等程文者隸焉皆考其業以次遞升

又分孟仲季月試以經義策論表章詔誥上等準一分中等準半分歲積至八分以上竝坐齋周三歲者充高等生員額四十名內蒙古色目各十人漢二十人以次充本學正錄司樂典籍管勾及侍儀舍人雖已試積分其有不事課業及違徇規矩者竝議罰然人猶以爲淹滯旣開科舉於是乃命積分生員與舉人同試於禮部策於殿廷又增至備榜而加選擇焉而學校亦入於科舉矣元世紛紛望科舉者久至是說者遂謂太平可立致於是集賢修撰虞集因會議學校遂上議曰師道立則善人多學校者士之所受教以致於成德達材者也今天下學官猥以資格授彊加之諸生之上而名之曰師爾有司弗信之生徒弗信之於學校無益也如此而望師道之立可乎下州小邑之士無所見聞父兄所以導其子弟初無必爲學問之實意師友之游從亦莫辨其邪正然則所



謂賢才者非自天降地出安有可望之理哉爲今之計莫若使守令求經明行修成德者身師尊之至誠懇惻以求之其德化之及庶乎有所觀感也其次則求乎操履近正而不爲詭異駭俗者確守先儒經義師說而不敢妄爲奇論者眾所敬服而非鄉愿之徒者延致之日諷誦其書使學者習之入耳著心以正其本則他日亦當有所發也其次則取鄉貢至京師罷歸者其議論文藝猶足以聳動其人非若泛泛莫知根柢者矣集之意在清其源與程鉅夫意合然有司日以怠以爲科舉得人而選人之道尙未清也泰定時由進士入官者百之一由吏進者十之九帝欲以中書傅巖起爲吏部尙書御史韓鏞上言吏部掌天下銓衡巖起從吏入官烏足盡知天下人才况尙書秩三品巖起累官亦止四品耳於法亦不得升制可其奏然巖起後竟至左丞官已躋二品且登政府

矣未幾文宗立御史陳思謙言銓衡之弊以爲入仕之門太多黜陟之法太簡州郡之任太淹朝省之除太速欲設三策以救四弊一曰至元三十年以後增設衙門冗濫不急者從實減併其外有選法併入中書二曰參酌古制設辟舉之科令三品以下各舉所知得才則受賞失才則受罰三曰古者刺史入爲三公郎官出宰百里蓋使外職識朝廷事體內官知民間利病今後歷縣尹有能聲善政者受郎官御史歷郡守有奇才異績者任憲使尙書其餘各驗資品通遷在內者不得三考連任京官在外者須歷兩任乃遷內職績非出類守不敗官者則循以年勞處以常調凡朝缺官員須二十月之上方許遷除庶幾其可也帝命中書議行之其後科舉行十九年元統元年九月廷試訖時天子新立年少伯顏爲丞相雖不欲行漢儒學而平章政事徹里帖木兒以驛請試官供



帳甚盛心大不平於是聳伯顏以罷進士科參知政事許有壬詣中書爭之伯顏曰科舉取人實妨選法有壬言今通事等天下凡三千三百二十五人歲除四百五十六人玉典赤太醫控鶴亦入流品又路吏及任子其途非一今歲自四月至九月白身補官受宣者七十三人而科舉一歲止三十五人科舉於選法果相妨耶伯顏心亦然之然科舉竟罷又其時方行苛覈御史蘇天爵上疏曰法令朝廷所定廷尉天下之平也或笞或杖受宣者必中稟中書或降或黜無例者必定擬刑部不可不慎重也今動輒曰省院臺勿用則當用者資政宣政之選乎是降爲雜職矣且職官犯贓猶有一貫及三百貫之分至論其罪則有殿降敘不敘之別豈有一遭論奏或犯或革前或事涉疑似輒坐雜職任用之科終身不敘之列豈法之平允哉且犯罪止於流遠家屬尙留京師被劾未

至官刑起遣卽歸鄉里蓋緣無事可尋強生掇拾潔白素著特爲染污致使高尚之人聞而退藏有志之士亦爲斂避當路與乏全才之歎後世有國無人之譏其所繫非細事也其後數歲後至元六年伯顏貶死明年至正元年帝以學士巉巉言遂復行科舉而減蒙古色目人明經二條增本經義易漢南人第一場四書疑爲本經疑增第二場古賦外於詔誥章表內又科一道十二年詔省院臺不用南人似有偏負宜依世祖舊制南人有才學者皆令用之自是累科南人進士始有爲臺憲官及尙書者矣是時紅巾賊起蔓延宇內十九年左丞成遵言淮南河南山東四川遼陽等處及江南所屬州縣避兵士民會集京師宜別設流寓鄉試禮部議解額蒙古色目南人各十五人漢人二十人又詔河南依元額就陝州置貢院應試又是福建行省初設鄉試額取七人而江西留



寓亦與試焉通取十五人充貢京師二十六年命增燕南河南山東陝西河東等處會試舉人額進士及第以下遞升官一級而科舉止於是年未幾而國祚移矣大率元代官人之制多定自世祖時後世不過損益而已初陳祐爲世祖言取士宜設三科又以宜以門蔭勞效參之語在祐傳其後許約言罷薦舉而獨行科舉命有司以防姦欺設邏卒以檢傳挾功名之士不拘小節或不以此爲嫌高蹈之賢必不屑就故中人以下之資可以利誘若學際天人道全體用者安肯決榮辱於三場競是非於寸晷哉當於科目之外別立薦舉之法以待遺逸其議亦頗與祐相出入然世祖時大臣辟舉任子入官甚多世祖未嘗設科取士而儒臣又以遺逸茂異文學才識薦舉登庸當時置集賢館以待之應詔者卽館穀焉飲食供帳車服之盛皆過其望其時翰林國史往往皆引致名

儒亦有至政府者亦無須科目也其自成宗而後踵而行之而鄭介夫極言翰林集賢秘書奉常之謬竝言提舉學校爲無益語在介夫傳然其大端善矣其科目自中葉始立中輟復行凡五十四年歷十有六科論者以爲元得普顏不花李黼李齊爲舉首及選取余闕泰不華汪澤民劉耕孫聶炳石普之屬皆能見危致命餘亦多名臣爲無忝科名矣其循例選舉亦想自世祖歷朝以來指不勝屈蓋國人多偏於國族勳舊貴游子弟中華縫掖之士僅得拔什一於千百也然亦有人材殆與周尙世家漢起吏屬無異故奔走禦侮之才亦往往出其中云至童子舉先於進士與入粟補官皆無甚表見而醫士陰陽皆立學以係藝術不復綴於此云論曰自科舉興進士科獨重而朝廷得人亦爲盛矣竊謂非辟除薦舉制科任子竝行不足以盡天下之才也至其用之當路則必



元書 卷二十一  
上知人而責實所謂敷納以言明試以功者也夫惟揚清激濁然後賢者奮而不肖愧退僥倖之途不絕則功名之路不開也然元取人亦云備矣雖未興制科而亦不過如此其下至卒史皆策勵之無遺亦天地之無棄物矣元首叢脞而股肱惰吏道由此雜焉故末世政衰而亂非選舉之失也

申端笏

申秉堃 刊

門人申憲文

門人曾廣載襄校

門人曾士琮詳校

元書卷二十一

元書卷二十二上

邵陽曾廉撰

職官志第七上

史言太祖起自朔土統有其眾部落野處非有城郭之制國俗純厚非有政事之條惟以萬戶統軍旅以斷事官治政刑任用者蓋不過一二親貴重臣及取中原太宗始立十路宣課司選儒術用之金人來歸者因其故官若行省若元帥則以行省元帥授之而已世祖即位登用老成大新制作立朝儀遷都邑遂命劉秉忠許衡酌古今之宜定內外之官其總政務曰中書省秉兵柄者曰樞密院司黜陟者曰御史臺體統既立其次在內者則有寺有監有衛有府在外者則有行省有行院有行臺有宣慰司有廉訪司其牧民者則曰路曰府曰州曰縣官有常職位有常員其長則蒙古

元書

卷二十二 職官志上

一



人爲之而漢人南人貳焉於是一代之制始備百年之間子孫有所憑藉矣大德以後承平日久彌文之習勝而簡質之意微僥倖之門多而方正之路塞官冗於上吏肆於下言事者屢疏論列而朝廷訖莫正之勢固然也予攷漢時丞相太尉御史大夫爲三公三師爲上公元之中書省漢之丞相府也樞密院漢之太尉府也御史臺漢之御史大夫府也三公則漢之上公也然漢人簡而權一元人繁而權分此其所以不如漢也至於命官之濫莫如以豸虎人爲御史以司徒國公子諸髡以平章政事予闍寺易曰負且乘未有若是其甚者也然祖宗之制具在一代之成憲足以綱維上下亦在子孫守之而已其因時而設置者亦未可遂以爲有私於天下也故史氏之言允矣然頗病其文傷於繇瀆釐及毫髮何其瑣也昔衛宏撰漢官儀豈非以班氏之簡而補其不備乎夫簡

者史之體則甯使衛宏補之班氏自不能兼收竝蓄以待後人之芟夷也今略仿班書存其大略昭一代之制而以府省院臺表列其後竝附記其祿入於下便省覽焉其入官始末未具者則亦闕之若大宗正以下則表從略識不逮也

太師府太師太傅太保府太保皆正一品銀印以處勳望耆臣號爲三公太師太傅皆太祖置或以世襲後罷世祖初置太保後置太傅成宗卽位始三府竝置俸皆一百四十貫米一十五石屬官各有諮議參軍俸皆四十五貫米四石五斗長史俸皆三十四貫米三石又有大司徒司徒太尉之屬或置或不置其置者又或開府或不開府蓋不恆有也

中書省中書令右丞相左丞相正一品銀印平章政事從一品右丞左丞正二品參知政事從二品平章以下共丞相印令右左丞相皆太宗時置後罷世祖始皆備置惟以皇太子領中書令自後



非皇太子不署是官右丞相以下時有增損至元二十九年以平章一員為商議省事三十年又以右丞一員為商議省事三十一年又置錄軍國重事然惟崇其名而已成宗元貞元年又改議事右丞為昭文大學士與中書省事大德七年詔定右左丞相以下平章二員右丞左丞各一員參知政事二員為八府然尋復紊焉武宗至大三年定制右左丞相各一員俸一百四十貫米二十五石文宗至順元年定制平章政事四員俸一百二十八貫米一十二石右丞左丞仍各一員俸米同平章政事參知政事仍二員俸九十五貫米九石五斗其歲罷左丞相專任右丞相燕鐵木兒死復故順帝後至元元年又專任右丞相五年又特號大丞相伯顏死復故至元以後又有添設或分省各路無定員省總國政領六部屬官參議四員正四品俸五十九貫米六石典左右司文牘左司郎中右司郎中各二員正五品俸四十二貫米四石五斗員外郎各二員正六品俸三十四貫米三石都事

各二員正七品俸二十八貫米三石左司掌吏戶禮右司掌兵刑工各有其科初世祖中統元年以吏戶禮為左三部兵刑工為右三部各統置尚書二員侍郎二員至元七年始分列六部後定尚書各三員正三品俸七十八貫米八石侍郎各二員正四品俸五十三貫米五石又各領郎中二員從五品俸三十四貫米三石員外郎二員從六品俸二十八貫米三石吏部掌銓選封除考課首領官主事三員戶部掌戶口錢糧土田主事八員領萬億寶源萬億廣源萬億綺源萬億賦源四庫都提舉各一員諸路寶鈔達魯花赤一員都提舉一員皆正四品提舉各一員正五品皆有同副寶鈔達魯花赤有副品同提舉又富甯庫提舉大都宣課大都酒課二提舉有同副又寶鈔總庫印造寶鈔庫燒鈔東西庫順承文明光熙健德和義崇仁六行用庫抄紙坊印造鹽茶等引局有達魯花赤或提領大副使宣課司又分領大都四市官又京畿都漕



運使司分駐河西務都漕運使司運使皆正三品俸五十六貫米六石同知皆

正四品俸三十九貫米三石五斗副使皆正五品俸三十四貫米三石運判皆正六品俸二十六貫米二石五斗

司各二員河西務判官增一員京畿分領新運糧提舉司有達魯

花赤都提舉同副京師二十二倉監支納大副使通惠河運糧千

戶所河西務分領本處十四倉通州十三倉十七河倉及直沽廣

通倉各監支納大副使又檀景等處采金鐵冶都提舉司都提舉

正四品有同副皆屬焉順帝時增司計官四員禮部掌禮樂祭祀

朝會燕享貢舉主事二員領侍儀司侍儀使四員正三品俸七十貫米七石五斗

引進使二員正四品俸四十八貫米四石五斗奉班都知一員正七品俸二十六貫米二石五斗

通事舍人一十六員從七品俸二十五貫米二石侍儀舍人一十四員從九品

俸二十七貫米一石五斗又儀鳳司大使五員從三品副使四員正四品教坊司

大使三員正四品副使四員正五品教坊並有達魯花赤一員正

四品又鑄印局白紙坊大副使掌薪令司丞侍儀司又分領法物

庫提點大副使儀鳳司又分領雲和安和常和大樂四署令丞廣

樂庫大副使教坊司分領興和祥和二署令丞皆屬焉尚書又兼

領會同館有大副使掌接伴蠻夷朝貢兵部掌兵站郵傳屯牧主

事二員領打捕鷹房民匠四都總管各有達魯花赤總管皆三品

有同副判官又大都陸運提舉司及其副大都總急遞鋪提領皆

屬焉刑部掌刑名法律訟獄主事三員司獄及丞司籍提領同提

領為之屬工部掌營繕修濬主事五員領隨路諸色民匠都總管

府諸路雜造茶迭兒局及三人匠五總管府有達魯花赤或同副

又左右八作司二提舉受給庫符牌局平則光熙二門密場都城

永平宏州中山宣德大甯大同保定彰德順德懷慶大名興和晉

甯冀甯別失八里各處諸人匠織染織造皮貨毛段紋錦各提舉



同副提領大副使直長各總管又分領出蠟鑄瀉梵像鑲鐵瑪瑙銀玉石木油漆氈皮簾網繡造紋錦紗羅段匹絲金顏料織染各司提舉同副各庫局大副使或提領及副皆屬焉省又有斷事官四十一員皆御位下及中宮東宮諸王各投下怯薛歹為之掌政刑之屬正三品俸有數等多至八十二貫少至四十貫米多至八石五斗少至四石客省使四員正五品俸三十貫米副使二員正六品俸二十八貫米三十石直省舍人三十三員從五品俸三十貫米三掌奏事給使差遣掾屬檢校四員正七品掌檢校文牘稽失照磨一員掌磨勘管勾一員掌出納架閣庫管勾二員掌度藏皆正八品又蒙古回回架閣庫管勾各一員斷事官屬經歷知事各一員左三部右三部各照磨一員左右部架閣管勾二員諸總管亦有經歷知事或提控照磨隸焉又統山東西河北二十九路八州別見寰宇志又詳定使司詳定使二員正三品副使二員正四品

掌書記二員正七品至正十七年置掌詳定四方獻言善惡以中書官提調之初世祖至元七年立尙書省置丞相二員平章二員右丞左丞二員參政三員八年併入中書二十四年復立尙書省二十八年罷武宗至大二年又復立尙書省設置如故四年復併入中書自是尙書省不復置  
樞密院知院六員從一品俸一百二十九貫米二十三石五斗同知四員正二品俸一百六貫米二十一石副使二員從二品俸九十五貫米九石五斗僉書二員正三品俸九十貫米九石五斗同僉二員正四品俸五十九貫米六石院判二員正五品俸四十二貫米四石五斗屬官參議二員正五品俸三十九貫米三石五斗經歷二員從五品俸二十四貫米三石都事四員正七品俸十八貫米二石照磨二員正八品架閣庫管勾一員正九品同管勾一員俸皆十貫米  
石二初世祖中統四年置樞密院以燕王判院明年命劉秉忠同議院事始設副使最重其職以為皇太子副也至元七年置同知樞



密院事及院判猶以皇太子知院事故名曰同知二十八年始置  
 知樞密院事一員又以中書平章商議院事延祐後始定今制至  
 正十三年復令皇太子領樞密院又設分院於衛輝彰德直沽沂  
 州增同知副樞密以資防禦院總軍政領左右中前後武衛隆鎮  
 右阿速左阿速唐兀貴赤忠翊西域宗仁左翊右翊虎賁十七衛  
 都指揮使各三員正三品俸七十貫米七石五斗皆有副使二員從三品俸五十貫米九貫米  
 六石僉事二員正四品俸四十八貫米四石五斗武衛左右阿速貴赤西域增達魯  
 花赤一員秩俸同都指揮使各有鎮撫千戶彈壓教官隆鎮衛官別見寰宇  
 志初中統中立武衛軍至元元年改侍衛親軍八年立左右中三  
 衛十六年又置前後二衛為五衛掌宿衛扈從二十五年又復立  
 武衛掌修治城隍及京師內外工役而唐兀衛立於至元十八年  
 貴赤衛立於二十四年西域親軍立於元貞元元左右阿速衛初

為阿速軍隸前後二衛至大二年始改立左右阿速衛又唐兀衛  
 立於至大三年又忠翊衛初曰中都威衛隸於徽政院至治元年  
 始名曰忠翊改屬焉又宗仁衛立於至治二左右翊虎賁不知  
 其置年又山東河北蒙古大都督府大都督三員從二品同知從  
 三品副使從四品分領六萬戶府河南淮北蒙古軍都萬戶府正  
 三品副萬戶從三品分領四萬戶府大都督府有經歷都事鎮撫  
 又回回礮手軍匠上萬戶有達魯花赤及副延安屯田打捕總管  
 有達魯花赤同知大甯海陽屯田打捕長官有達魯花赤軍官皆  
 有鎮撫千戶教官經歷知事照磨彈壓或有提控又有宣忠幹羅  
 思衛威武阿速衛東路蒙古侍衛鎮守海口侍衛親軍屯儲皆有  
 都指揮司又有女直侍衛高麗女直漢軍管女直侍衛親軍三萬  
 戶府及宣鎮侍衛皆屬焉院又有斷事官八員品同省俸五十九貫米六石客



省大使二員從五品俸三十一貫米三石副使二員從六品俸二十二貫米二石斷事官復

有經歷為其屬初至元時立欽察衛至治中分為左右文宗以寵

燕鐵木兒乃別立大都督府大都督三員正二品同知二員正三

品副都督三員從三品僉事三員正四品而以左右欽察龍翊三

衛都指揮司及哈刺魯萬戶府屬焉不隸樞密院矣衛司諸官皆

同左右諸衛府同軍匠萬戶有達魯花赤

御史臺御史大夫二員從一品俸一百一十八貫米一十二石中丞二員正二品俸米同樞密同

知侍御史二員從二品俸米同樞密同治書侍御史二員品同侍御史俸米

同樞密院屬官經歷都事管勾品俸悉同樞密院初太祖時已有御史大夫然皆

散號不立臺至元五年世祖始建臺設官臺掌糾察領殿中司殿

中侍御史二員正四品俸四十八貫米四石五斗掌正朝班察院監察御史三十二

員正七品俸二十八貫米三石掌刺舉又領山東東西河東山西燕南河北江

北河南山南江北淮西江北淮東山北遼東八道肅政廉訪

使司初太宗時已有廉訪使之名耶律楚材為中書令以楊奐為

河南徵收稅課所長官兼廉訪使然無專官世祖立司始曰提刑

按察司至元二十八年改今名每道廉訪使二員正三品俸中統鈔八

頃副使二員正四品俸四十五貫職田四頃僉事四員正五品俸三十貫職田三頃又各領

經歷知事管勾為其屬初十八年亦立登聞鼓院以申冤抑後罷

大宗正府札魯花赤四十二員從一品俸一員一百十八貫米一十二石二十

貫米六石五斗太祖置曰札魯花赤言斷事官也始時位尊權重大札魯花

赤以比漢大將軍大必闡赤以比漢丞相至元二年始立大宗正

府處之府掌決諸囚犯以諸王為府長餘悉御位下及諸王有國

封者又有忤辭奉旨署事別無頒受宣命屬官有郎中員外郎各

二員品皆同六部郎中俸三十六貫米三石五斗員外郎俸三十一貫米三石都事二員從七品俸二十六貫米二石



五 照磨架閣管勾司獄皆備仁宗時稱宗正府去大致和元年詔大都上都蒙古色目與漢人相犯者歸宗正府處置餘悉歸刑部及有司後至元元年仍稱大宗正府添設掌判官二員

宣徽院院使六員同知副使僉院同僉院判各二員院使同知品同樞密知院同知而俸微差院使俸一百一十八貫米二十二石同知俸一百六貫米一十二石副使以下品

俸悉同樞密院初國制初重典內膳皆以親賢領之至元十五年始立宣徽院院掌玉食宗戚燕享怯僻糧食及諸支發收受領光祿寺卿四員正三品俸七十貫米七石五斗少卿二員正四品俸四十二貫米四石六斗丞二

員從五品俸三十九貫米四石五斗尚舍寺闌遺監各太監一員正四品俸皆四十八貫米四石丞皆二員正六品

尚舍寺多一員少監皆二員正五品俸三十九貫米三石五斗丞皆二員正六品俸三十一貫米三石尚食局提點從五品大使正六品副使正七品直長正八品尚牧所提舉同副沙糖局永備倉提點大副使豐潤署尚珍署

各達魯花赤令丞品均同尚食局光祿寺又分領大都上都尚飲尚醞局醴源倉各提舉提點大副使直長尚食局又分領大都上都生料庫大倉柴炭局提點提舉大副使直長尚舍寺分領諸物庫提領大副使尚珍署分領安豐懷遠稻田所提領永備倉分領豐儲庫大使又淮東西打捕總管府達魯花赤總管皆正三品同知正五品府判正六品龍慶栽種宏州種田二提舉司皆有達魯花赤提舉同副常湖等處茶園都提舉司達魯花赤提舉同副品亦略同尚食局惟宏州降一等淮東西又分領各司局所茶園司又分領七提領又建甯北苑武夷茶場提領竝屬焉

宣政院院使十員同知副使僉院皆二員同僉院判皆三員品俸皆同宣徽院初至元元年立總制院而領以國師二十五年始改立宣政院院掌諸釋教事及吐蕃境領大都上都規運提點所達



魯花赤提點大副使及同副上都利貞庫提領副使大濟倉監支  
納大使興教寺管房提領又統吐蕃河州脫思馬朵甘思烏斯藏  
等處宣慰使司都元帥府四河州員闕脫思麻及烏斯藏皆使五  
員朵甘思使四員朵甘思及烏斯藏皆同知二員副使一員所屬  
官皆別見寰宇志初文宗天祿元年罷會福殊祥二院改置大禧  
院二年改大禧宗禋院院使六員同副以下官均如宣政院又領  
隆禧會福崇祥隆祥壽福五總管府達魯花赤及副總管及同知  
治中判官復各分領營繕田賦財用資用營田民佃宣農善農濟  
農各司所達魯花赤提舉同副提領大副使順帝後至元六年以  
五府竝改爲規運提點所正五品竝添置萬甯提點所竝屬宣政  
院

大司農司大司農四員品同宣徽院使大司農卿二員品同宣徽

同知少卿二員品同宣徽副使

俸並

丞二員從三品

俸九十貫米  
九石五斗

初

中統二年始立勸農司至元七年改爲大司農司置官五員十四  
年罷以按察司兼領勸農事後改立農政院又改務農司司農寺  
二十三年仍爲大司農司皇慶二年定今官制司掌農桑水利學  
校饑荒領永平屯田總管府達魯花赤總管同知供膳司達魯花  
赤提點令丞籍田署令丞供膳司又分領輔用庫大副使興中府  
油戶提領大副使蔚州麪戶提領副使竝屬焉後至元二年又置  
都水庸田使司於平江尋罷五年復立至正十二年又立都水庸  
田司於汴梁使二員副使僉事皆二員十三年又置分司農司立  
法募民佃種屯田十五年復置大兵農司其屬有兵農千戶百戶  
及鎮撫司十八年又置團練安撫勸農使司使二員同知副使各  
二員參謀六員檢督六員十九年又置大都督兵農司司置分司



十道

翰林兼國史院承旨六員從一品學士二員正二品侍讀學士侍

講學士各二員從二品直學士三員從三品對品俸米均同宣政院屬官待制

五員正五品俸二十九貫米二石五斗修撰三員從六品俸二十八貫米三石應奉翰林文字

五員從七品俸二十五貫米二石編修十員檢閱四員典籍二員皆正八品編檢

俸二十二貫米二石典籍二十貫米一石五斗至元元年置後文宗立藝文監有太監二員從三

品少監二員從四品丞二員從五品監書博士正五品藝林庫提

點大副使廣成局大副使直長至正六年改崇文監隸於院又奎

章閣學士院有大學士四員正二品侍書學士二員從二品承制

學士二員正三品供奉學士二員正四品參書從五品屬官授經

郎羣玉內司尉亞尉僉司司丞皆天祿二年置至正六年改宣文

閣不置學士惟設授經郎蒙古翰林院承旨七員學士二員侍讀

侍講學士各二員直學士二員待制四員修撰二員應奉五員品

俸並同至元十二年置院領蒙古國子監祭酒一員從三品俸五十九貫米

五司業二員正五品俸二十九貫米二石五斗丞一員正六品俸三十貫米三石博士二員

正七品俸二十六貫米二石五斗助教教授各二員並正八品俸二十二貫米二石學正學錄

各二員俸十一貫米一石五斗又回回國子監設官均如蒙古掌管教習亦思

替非文字又內八府宰相以國戚勳貴子弟為之掌諸王朝覲儼

介之事遇有詔令則與蒙古翰林院官司譯寫而潤色之

集賢院大學士五員學士二員侍讀侍講學士直學士各二員待

制修撰各一員大學士品俸同翰林院承旨餘品俸並同翰林院初集賢與翰林院同一官署至

元二十二年始分置院掌提調學校徵求隱逸召集賢良領國子

監祭酒司業丞博士助教學正學錄品俸皆同蒙古國子監官又興文署令丞典

簿並屬焉又昭文館大學士無定員世祖置以優耆臣



太史院院使五員至元十五年始置初為令後曰院使院掌天文  
秬數領春官正兼夏官正秋官正兼冬官正中官正各一員保章  
正副掌秬印秬管勾各省司秬靈臺郎監候挈壺正司辰郎燈漏  
直長教授學正校書郎星秬生皆屬焉

典瑞院院使四員初中統元年始置符寶郎至元十六年立符寶  
局十八年改典瑞監置卿成宗大德十一年為院院掌寶璽金銀  
符牌

將作院院使七員至元三十年置院掌成造珠寶刺繡百色造作  
領諸路金玉人匠大都等路民匠及異樣局三總管府皆有同副  
金玉人匠府異樣局又有達魯花赤又分領行諸路金玉人匠總  
管府玉局金銀器盒瑪瑙陽山瑪瑙宣德隆興等處瑪瑙人匠五  
提舉司皆有同副又金絲子鞋帶斜皮瓘玉瓷畫粧釘大小雕木

溫犀玳瑁漆鈔冠冕九局大副使或直長又大同采砂所管匠都  
提領所管領珠子民匠官監造諸般寶貝官收支諸物庫諸達魯  
花赤提領大副使大都民匠府分領備章總院尚衣御衣御史  
道安三局高麗及織佛像二提舉司各達魯花赤提舉同副大副  
使異樣局分領異樣紋繡綾綿織染紗羅三提舉司皆有同副又  
鈔金顏料總庫大副使皆屬焉

太醫院院使十二員四院同知僉院同僉院判各二員院使皆正

二品俸皆一百一貫米十一石同知皆正三品俸八十二貫米八石五斗僉院皆從三品俸七十貫米七石五斗

同僉皆正四品俸五十九貫米六石院判皆正五品俸四十三貫米四石五斗初中統元年

置宣差提點太醫院事後改尚醫監至元二十二年復為太醫院  
院掌醫事領廣惠司卿少卿丞司掌回回藥物分領大都上都回  
回藥物院達魯花赤大副使又御藥院御藥局行御藥局三達魯



元書 卷二十二  
花赤大副使或直長御香局大都惠民局上都惠民局三提點司  
令又醫學提舉司及其副司又分領官醫提舉司大都保定彰德  
東平四路提舉司副河間大名大同晉甯冀甯濟甯濟南廣平興  
和遼陽十路提舉及副衛輝懷慶大甯提舉皆屬焉至元二十五  
年又置河南江浙江西湖廣陝西五省官醫提舉司五提舉有同  
副

太常禮儀院使同知僉院同僉院判各二員品同太史諸院俸使八  
米八石五斗同知七十二貫米七石五斗僉院俸四十八貫米四  
石五斗同僉俸四十二貫米四石五斗院判俸三十七貫米四石屬官博士二員正七  
品奉禮郎二員檢討一員太祝十員協律郎二員竝從八品初中  
統元年立太常寺設丞至元二年翰林兼攝太常寺九年設卿少  
卿武宗至大元年改院四年復為寺仁宗延祐元年復改始或以  
翰林院兼攝或大司徒領之天祿二年定今制院掌大禮樂祭享

宗廟社稷封贈諡號太廟郊祀社稷大樂四署令丞皆屬焉

侍正府侍正十四員正二品同知二員正三品參府二員從三品

侍判二員正四品俸米對品同太醫院院使同知僉院同僉竝同至順二年置府掌內廷近侍之

事領奉御二十四員正五品尙冠尙衣尙鞞尙沐各奉御二員從

五品其副亦各二員從六品尙飾兼尙輦奉御二員正六品其副

亦各二員正七品奉御掌簿四員從七品又拱衛直都指揮使司

掌儀衛達魯花赤一員正三品都指揮使四員品同俸七十貫米  
七石五斗副

使二員從三品俸五十九  
貫米六石僉事二員正四品俸四十八貫  
米四石五斗至元三年置

後隸宣徽院復隸禮部至順二年改隸侍正府司又分領儀從庫

大副使控鶴十三所百戶二十六員皆屬焉給事中兼修起居注

二員正四品俸五十三  
貫米五石左右侍儀奉御同修起居注各一員俸四十八  
貫米四石

五初至元五年始置起居注左右補闕掌記錄諸司奏聞事十五



年改延祐七年定今制

通政院院使四員從二品俸米同太同知二員品俸同副使二員品同太

院俸五十九貫米六石僉院一員品同太常寺同同僉一員品下太常院同院判一員品俸

並同太常院初國置驛以通使傳設脫脫禾孫有正副以辨奸偽至元七

年立諸站都統領使司十三年改院管站赤領廩給司提領令丞

十四年分置大都上都院使同知以下設官竝同二十九年又置

江南分院至大四年罷以其事歸兵部延祐七年復置漢地掌以

兵部北地領以本院定制上都院使同知副使僉院止各一員

都護府大都護四員品俸均同同知二員品下通政院副都護二員品

通政副使二至元十一年初立建昌甯遠都護府後罷十七年畏吾

兒置斷事官尋改領北庭都護府二十年改大理寺二十二年復

為府掌畏吾兒詞訟

崇福司使四員同知二員副使二員品俸均同通政院丞二員品下

院判一至元二十六年置延祐二年改為院置領院事省併天下也

里可溫掌教司七十二所歸之七年復為司司掌領馬兒哈昔列

班也里可溫十字寺祭享事

太府監太卿六員太監六員少監五員丞五員初中統四年置監

至元四年為宣徽太府監大德九年改為院院判參用宦者至大

四年復為監監掌左右藏錢帛出納領內右左三藏庫提點大副

使

度支監諸設官皆如太府監惟卿三員太監二員少監三員丞二

員國初置李可孫以重臣領之至元十三年以宣徽兼之至大二

年改為院四年復為監監掌給馬駝芻粟

利用監卿八員太少監各五員丞四員至元四年置大德十一年



改爲院至大四年復爲監監掌出納皮貨衣物領資用庫提點大副使怯憐口皮局人匠提舉同提舉貂皮局提舉同副貂鼠局副使直長染局副使直長又雜造雙線軟皮二局大副使直長及斜皮局副使二熟皮局大副使直長皆屬焉

中尙監卿八員太少監丞各二員至元十五年置尙用監二十四年改中尙監三十年分置兩都灤河三庫怯憐口雜造等九司局而總領之至大元年改爲院四年復爲監參用宦者三人監掌大幹耳朵位下怯憐口諸務及內府氈帳等陳設領資成庫提點大副使

章佩監卿五員太監四員少監二員丞二員至元二十二年置至大元年改爲院四年復爲監監掌宦者速古兒赤所收御服寶帶領御帶異珍二庫提點大副使御帶庫以中官爲之掌繫腰偏束

等帶併條環諸物供奉御用以備賜予異珍庫掌御用及后妃公主首飾珍寶

經正監太卿一員太少監丞各二員至大四年置卿太少監竝奴都赤爲之丞流官爲之掌營盤納鉢及標撥投下草地詞訟

秘書監卿四員太少監丞各二員屬官著作郎二員從六品著作佐郎二員正七品秘書郎二員正七品校書郎二員正八品辨驗書畫直長一員正八品至元九年置大德九年給銀印監丞皆大臣奏薦選世家名臣爲之延祐元年制卿四員參用宦者二人監掌歷代圖籍及陰陽禁書七監卿太卿皆正三品

俸七十貫米七石五斗 太監

皆從三品

俸五十九貫米六石

少監皆從四品

俸四十二貫米四石五斗

丞皆正五品

俸三十九貫米四石

初太宗時置編修所於燕京經籍所於平陽至元三年以經籍所入京四年改爲宏文院置學士後罷



司天監提點一員監三員皆正四品俸同太府少卿少監五員正五品俸五十貫米

五石承四員正六品俸三十一貫米三石屬官提學教授學正各二員天文算秝

三式測驗漏刻五科各管勾二員並從九品又陰陽科管勾一員

押宿官二員司辰官八員天文生七十五人中統元年因金制立

司天臺設官屬至元十五年別置太史院以頒秝歸院以學校歸

臺皇慶元年改為監回司天監設官並同惟教授五科管勾各

減一員有陰陽生一十八人無提學初世祖在藩徵回回札馬刺

丁為星學至元八年亦置司天臺皇慶元年改監

都水監卿二員品俸同太府太監少監一員品俸同太府丞丞二

員正六品俸三十貫米三石監掌水利河渠隄防橋梁牐堰至元七年置十

三年併入工部隸大司農司二十八年復置領大都河道提舉司

有同副

司禋監內監少監丞各二員世祖時置後罷至正元年復置監掌

師翁祭祀祈禳事

太僕寺卿二員從二品俸七十貫米七石五斗少卿二員從四品俸四十二貫米四石五斗丞

二員從五品俸二十九貫米三石五斗初中統元年設羣牧所至元十六年改尙

牧監十九年改太僕院二十年改衛尉院二十四年罷院立太僕

寺尋隸中書置提調官大德十一年復改太僕院至大四年復為

寺寺掌阿塔思馬匹

尙乘寺卿四員正三品俸米同大僕卿少卿丞各二員品俸均同太僕寺至元二十四

年罷衛尉院分置尙乘寺大德十一年改院至大四年復為寺寺

掌上御鞍轡輿輦理四怯薛阿塔赤詞訟領資乘庫提點大副使

武備寺卿六員同判六員少卿丞各四員惟同判從三品俸五十九貫米六石

卿少卿丞品均同尙乘寺俸米亦同初至元五年立軍器監二十年改



武備監隸衛尉院二十一年改爲寺後又改爲院至大四年復改爲寺寺掌繕治戎器兼受給領壽武利器二庫提點大副使廣勝庫達魯花赤大副使大同平陽保定真定東平大甯六路及宣德蔚州八軍器人匠提舉司及遼河諸色人匠大都弓匠二提舉司皆有達魯花赤同副其屬又各有甲局弓局箭局又大都上都通薊四甲匠提舉司皆有達魯花赤同副惟上都無達魯花赤上都又分領四甲局又太原彰德咸平隆興平灤及懷孟河南等路六軍器人匠局汴梁大名歸德汝甯奉聖陳許七軍器局及欠州武器局或達魯花赤大副使或大副使院長又大都上都豐州三雜造局大都弦局益都濟南箭局廣平甲局或提領或達魯花赤大副使院長局使皆屬焉

徽政院至元三十一年置初至元十九年爲皇太子立詹事院皇

太子薨以錢糧選法工役悉歸太后位下改爲徽政院泰定元年罷復立詹事院元統元年復置徽政院掌文宗皇后位下事置官屬三百六十六員至正時罷

中政院院使七員同知僉院同僉院判員品皆同典瑞院俸米亦同屬

官司議二員從五品俸米三十四貫米三十石長史二員正六品俸米二十六貫米三十石初元貞二年

置中御府大德四年改中正院至大四年省併入典內院皇慶二年爲中政院院掌中宮財賦營造供給並番衛之士湯沐之邑領

中瑞內正二司司皆有卿正三品中瑞卿五員丞二員正四品內

正卿四員少卿二員正四品丞二員從五品俸米均同太僕寺內正分領尙

工署令丞贊儀署提領大副使直長尙工又分領玉列赤局提領大副使直長又管領六盤山等處怯憐口民匠都提舉司有達魯花赤同副司又分領奉元等路五長官司十提領所又朔正司令



元書 卷二十二  
五員丞四員品同中瑞卿丞司又分領上都諸色人匠及隨路打捕鷹房納綿等戶二提舉司各有達魯花赤同副直長歸德亳州等處管民提領所有同副又奉宸廣禧寶昌三庫及典飲局達魯花赤提舉提點大副使又江浙等處財賦管領本位下怯憐口諸色民匠打捕鷹房二都總管府管領大都及諸路打捕鷹房民匠等戶二總管府管領種田打捕鷹房民匠及海西遼東哈思罕等處鷹房人匠怯憐口二萬戶府皆有達魯花赤皆正三品同知皆正五品副總管副萬戶皆從五品惟種田府無達魯花赤無貳江浙都總管又分領提舉司三庫局各一大都總管又分領提舉司十一提領司二十五 一諸路總管又分領提舉司四提領所十一一諸路總管又分領提舉司四提領司十二皆有同副提舉司又各有達魯花赤種田府屬十海西府鎮撫司一千戶所十一又遼

陽等處金銀鐵冶都提舉司正四品有同副又管領大名等處種田諸戶管領大都等路打捕鷹房二總管府及管領本投下大都諸色戶計都達魯花赤管領東平等路管民官總管正五品總管皆有副又管領大名等路宣撫司燕京管民千戶所從七品有提領及副又管領曹州東明蒲城汴梁本投下民戶四提領所皆正七品有同副金銀場七提領所皆從七品有同副又管領大名等路民戶有副鐵冶管勾所有同副皆屬焉

長信寺大德五年置掌大幹耳朵事長秋寺皇慶二年置掌武宗五幹耳朵戶口錢糧營繕諸事承徽寺至治元年置掌仁宗荅里麻失里皇后位下事長甯寺至治三年置掌英宗速哥八刺皇后位下事長慶寺泰定元年置掌成宗幹耳朵事甯徽寺天祿二年置掌明宗八不沙皇后位下事延徽寺後至元六年置掌甯宗幹



耳朵事皆有卿少卿丞卿長信四員長秋承徽皆五員長甯長慶  
 甯徽皆六員皆三品俸七十貫米七石五斗少卿皆二員惟甯徽四員皆從四  
 品俸四十七貫米四石五斗丞皆二員惟長慶一員皆從五品俸三十九貫米三石五斗長信長  
 秋承徽各分領怯憐口諸色人匠提舉司皆有達魯花赤同副長  
 信一司竝領大都上都二鐵局大副使長秋承徽各二司為之屬  
 崇政院院使六員同知以下皆二員品同中政院俸米亦同初至順三  
 年置昭功萬戶都總使司二員正三品同知一員從三品副使二  
 員正四品以處潛邸扈從之臣司領宮相都總管府達魯花赤有  
 副都總管有同副分領織染雜造人匠管領諸部打捕鷹房納綿  
 等戶二總管府皆有達魯花赤同副納綿府有治中府判二府又  
 分領諸局庫及各處大副使提領又繕工司卿少卿丞各二員其  
 分領金玉珠翠織染雜造三提舉司同副及富昌庫大副使皆屬

焉至正六年罷司立資政院掌完者忽都皇后位下事惟繕工司  
 先罷不復置以集慶錢糧併入其餘府司亦皆屬焉二十六年改  
 崇政院掌肅良合皇后位下事

宮傳府至正三年以長吉為宮傳官初世祖置太子太師太子太  
 傅太子太保尋省至大中復設又置太子少師太子少傅太子少  
 保然皆兼官不常置又至元十年置東宮宮師府詹事以次官屬  
 三十八人時置宮臣賓客二員左右諭德左右贊善各一員校書  
 郎二員庶子中允各一員三十一年皆罷至正時以皇太子復置  
 府九年立端本堂為皇太子學宮十三年置賓客二員正二品左  
 右諭德贊善均各一員從二品文學二員從五品中庶子中允各  
 一員從六品後復罷宮傳府

詹事院詹事三員從一品同知二員正二品副二員從二品丞二



員正三品屬官中議二員正五品長史二員從六品初至元十九年置詹事院左右詹事各二員副丞判各二員三十一年罷院歸徽政院大德至大延祐間屢立皆旋罷泰定元年復置天祿改爲儲慶使司復改詹事院又改儲政院置院使同知僉院同僉院判品俸皆同典瑞院至正十三年復爲詹事院院掌輔翼太子領家令府正二司家令二員正三品二員正四品丞二員正五品俸同長信諸寺府正二員正三品丞二員正五品初至元二十年同置家令掌皇太子飲膳供張倉庫府正掌鞍轡弓矢三十一年家令改內宰司府正改宮正司俱隸徽政泰定元年復改家令府正歸詹事又改歸儲政院至正時復隸詹事院家令又分領諸署局倉場所提點提領大副使府正又分領資武翼用二庫各提點大使又延慶司使二員有同副儲膳司卿四員有少卿丞典用典醫典牧典寶四

監皆有卿太少監丞使卿皆正三品惟典醫增達魯花赤又分領廣濟典藥各司局又管領怯憐口諸色民匠隨路諸色人匠管領諸路怯憐口民匠江淮等處財賦四都總管府管領大都等路打捕鷹房膳粉人戶汴梁等路管民二總管府各分領人匠典製貂鼠軟皮鞍子鐵染器物雜造金銀器盒粧釘雕木材木金絲畫油銅玉瑪瑙皮筋銷鉢砌金珠翠納色氈線泥瓦諸司署局場所提領大副使長官皆屬焉又左右衛率使各二員左右都威衛使司各三員皆正三品各有副僉有教授鎮撫千戶百戶又儀衛司指揮二員從五品有副皆隸東宮至正十七年又置分詹事院大撫軍院知院四員從一品同知二員副使同僉各一員至正二十七年以皇太子總天下軍馬置二十八年罷

內史府內史九員正二品俸一百四十三貫中尉六員正三品俸一百十六貫司馬四



員正四品俸八十 諸議二員從五品俸四十 記室二員從六品俸四十 至

元二十九年封晉王於太祖四鄂爾多之地改王傅為內史延祐

五年分司京師並分置官屬領延慶司使同知典軍司典軍副使

及斷事官十有六員又隨路諸色民匠打捕鷹房都總管府總四

幹耳朵位下事管領保定等路阿哈探馬兒諸色人匠總管府掌

太祖大幹耳朵事管領打捕鷹房民匠總管府掌二皇后幹耳朵

位下事管領隨路諸色民匠打捕鷹房等戶總管府掌太祖幹耳

朵四季行營事管領隨路打捕鷹房諸色民匠怯憐口總管府掌

太祖四皇后位下事皆有達魯花赤總管同副又人匠納綿異錦

織染米麩金玉稻田打捕雜造十三提舉司人匠各提領所征軍

戶計打捕納綿麩米十一長官司有副或有同有達魯花赤又隨

路打捕鷹房諸色民匠總管府掌北安王位下事怯憐口諸色民

匠達魯花赤並管領上都納綿提舉司掌迭只幹耳朵位下事各  
有達魯花赤同府並隸晉王府

諸王傅官寬徹不花太子至齊王位下凡四十五王每位下各設

王傅傅尉司馬三員傅尉惟寬徹不花也不干幹羅溫三王有之

自此以下皆稱府尉又或少至一員多至三員齊王則又獨設王

傅一員

大都留守司留守五員正二品同知二員正三品副留守二員正

四品判官二員正五品初世祖置宮殿府行工部至元十九年罷

置司兼本路都總管知少府監事二十一年別置大都路都總管

府治民事並少府監歸司皇慶元年別置少府監延祐七年仍罷

監以司兼之司掌守衛宮城門禁啟開並調度供億營繕尙方供

張內苑花木領大都城門尉有副又廣誼司令判修內祇應二司



器物儀鸞犀象三局及四窰場真定保定大名晉甯各路匠官諸色收支諸庫大副使又器備庫提點大副使採木及人匠提舉司採山及木場各提領所又上林署令丞直長苜蓿養種二園提領花園管勾甸皮局大使修內祇應及各局場又各分領大小木泥瓦車繩銅粧釘竹作油漆畫銷金裱禱燒紅鐵減鐵盒鉢成鞍羊山鞍網刀旋銀轎子石雕木身琉璃燭刺赤針工水手各局提領管勾大副使並屬焉大都路都總管府達魯花赤二員正三品俸一百二十貫都總管一員品俸皆同副達魯花赤二員俸一百二十貫同知治中俱二員俸八判官推官各二員俸五十五貫府領大都路兵馬都指揮使司南北城各二員正四品司又分領左右警巡二院達魯花赤院使副判及司獄丞典又管領諸路打捕鷹房總管府有達魯花赤及副並同副又宛平大興二縣尹丞簿尉巡檢司皆屬焉至正

十年添設兵馬司四處每處都指揮指揮各二員副指揮各四員後又添設一處汎地在寰宇志十八年京師四隅又俱立大都分府又各立警巡分院

上都留守司兼本路都總管府設官如大都惟留守多一員亦有器物儀鸞修內三司局兵馬司警巡院又八作司餼廩司稅課提舉司有提舉同副提領大副使又萬億庫達魯花赤提舉同副萬盈庫廣積倉達魯花赤大副使平盈庫大副使行用庫提點大副使俱屬焉尙供總管府達魯花赤總管各一員並正三品有同副判府掌守護東涼亭行宮及游獵供需領景運倉提點大副使法物庫大副使香河巡檢雲需總管府設官與尙供府同府掌守護察罕腦兒行宮及行營供辦

行中書省河南江北江浙江西湖廣陝西四川遼陽甘肅嶺北雲



南征東十一處每省設丞相一員平章二員右左丞各一員參知政事二員品同中書省俸丞相二百貫平章右左丞百六十六貫參知政事百三十三貫初國有征伐分任軍民皆稱行省憲宗時有陝西行省左丞相參知政事然非經制中統初始以省官出領其事皆以宰執行某省事繫銜其後嫌外重乃改爲某處行中書省至元二十四年改行尙書省尋復故至大二年改行尙書省四年復故舊制參政之下又有僉省同僉後罷不置丞相或置或不置屬官亦有郎中員外郎又理問所理問正四品副理問從五品至正十二年又置淮南江北行省十六年又置福建行省十七年置山東行省二十三年又置廣西行省膠東行省二十六年又置福建江西行省

宣慰司宣慰使三員從二品同知銜一員從三品副使四員正四

品腹裏俸中統鈔使五百八十貫同知五百貫副使四百一十六貫行省俸至元鈔使八十七貫同知四十九貫副使四十二貫司分道以總郡縣行

省有政令則布於下郡縣有請則爲達於省有邊陲軍旅之事則兼都元帥府其次則止爲元帥府其在遠服則有宣撫安撫招討等司都元帥府都元帥二員副二員品同宣慰使元帥府達魯花赤一員元帥一員皆正三品宣撫司安撫司招討司皆達魯花赤一員使一員宣撫安撫有同副僉各一員招討無同副僉亦有損益不一厥制

諸路萬戶府上萬戶府管軍七千之上中萬戶府五千之上下萬戶府三千之上皆達魯花赤一員萬戶副萬戶各一員上府正官正三品副從三品中下正官從三品副從四品又各領鎮撫司上中下千戶所達魯花赤千戶副千戶上下百戶所百戶又各領有彈壓二員元統以後又置黎兵萬戶府水軍萬戶府義兵萬戶府義兵千戶所招討軍民萬戶府



儒學提舉司提舉一員從五品副提舉一員從七品世祖初中統時置各行省皆置一司各儒學教授學正學錄皆屬本路而統於提學司司掌學校祭祀教養錢糧之事其大都路提舉學校所則正六品屬兵馬司而以國子祭酒繫銜蒙古提舉學校司品同行省各提舉司至元十八年置惟江浙湖廣江西三省有之教授正八品及學正學錄路各設一人其散府上中州亦設教授一人下州設學正一人又有教諭與學錄同設教授命於朝餘皆禮部若行省及宣慰司劄付之官各書院山長與學正同

行樞密院院官品秩俱同樞密院初國有征伐之事則置行樞密院大征伐則止曰行院爲一方一事而設則曰某處行樞密院或與行省代設世祖時有西川東川行樞密院荆湖等路行院淮西行院沿江行院江西行院岳州行院江淮行院成宗時悉罷歸行

省至大時又置甘肅行樞密院致和元年置河南行樞密院皆旋罷惟嶺北行樞密院天祿二年置知院一員同副僉各二員同僉一員院判二員掌邊庭軍務凡大小事宜悉從裁決後至元中復置湖廣四川江浙淮南江北河南山東福建江西各行樞密院設官與嶺北同

行御史臺大夫一員中丞侍御史治書侍御史各二員品秩俱同內臺至元十四年始置江南諸道行御史臺二十七年復置陝西諸道行御史臺合京師內臺是爲三臺僚官有察院監察御史品秩與內察院同江南二十八員陝西二十員又南臺領江東建康江西湖東江南浙西浙東海右江南湖北嶺北湖南嶺南廣西海北廣東海北海南福建閩海十道肅政廉訪司西臺領陝西漢中河西隴北西蜀四川雲南諸路四道廉訪司每道使副僉員數品



俸皆同內臺惟兩廣海南僉事止二員

職田皆比腹裏諸司減半

行宣政院院使二員同知副使各二員同僉院判各一員品秩同內院初江浙置廣教總管府元統二年罷置江浙行宣政院後至元二年以西番寇起復置行宣政院

奉使宣撫初世祖置諸道宣撫司或以宰執行之最為重任後罷泰定二年分天下為十八道遣使宣撫清問吏民無定員亦不常置

經略使二員憲宗時世祖立經略使後罷至正十八年復置有參謀官辟名士一人行軍司馬一員以問民疾苦招諭叛逆旌表孝順存恤窮民

行都水監監少監丞各一員至正六年河南山東以水患立都水監八年復置行都水監於濟甯鄆城九年河南山東亦立行都水監  
監監領河防都提舉品秩同都水監

都轉運鹽司使皆正三品同知皆正四品副使皆正五品運判皆正六品大都河閒等路山東皆至元十二年立河東陝西等處至元二十二年立陝西都轉運司延祐六年改三司隸戶部各使二員同知副使各一員運判二員山東減運判一員河南增運判一員

員

腹裏俸使一百二十貫同知五十貫副使三十五貫運判三十貫

兩淮使二員同副各一員運判二員兩

浙福建使同判各二員無同知

行省俸使八十貫同知五十貫副使四十貫判官三十貫

大都河閒領

鹽場二十二山東場十九皆有令丞河東三場所有管勾同管勾提領副提領兩淮場二十九兩浙場三十四福建場七皆有令丞四川茶鹽轉運司使同副判各一員鹽場十二廣東鹽課提舉司從五品有同副場十三廣海鹽課提舉司都提舉從四品有同副專司鹽課司皆有檢校批驗所提領大副使



權茶都轉運司至元十四年立治江州後罷元統元年復置湖廣江西權茶都運使司司有七提舉司為其屬

海道運糧萬戶府達魯花赤一員萬戶一員並正三品副萬戶四員從三品至元二十八年置領海運千戶五所皆有達魯花赤千戶副千戶又海運香莎糯米千戶所並屬焉

市舶提舉司泉州廣東慶元三司提舉皆從五品同提舉二員從六品副提舉二員從七品初至元二十二年置廣東司後罷延祐元年復與泉州慶元同置

寶泉都提舉司至大三年初行錢法立資國院泉貨監以領之四年罷至正十一年置寶泉提舉司於河南及濟南冀甯凡九所江浙江西湖廣各一所其饒州信州韶州三所銅冶場提領大副使皆直隸提舉司

諸路總管府達魯花赤一員總管一員兼管勸農事江北則兼諸

軍奧魯上路並正三品俸皆八十貫腹內職田皆十六頃行省八頃下路並從三品俸皆七十貫腹

行省上路有同知治中推官判官官下路無治中腹裏俸上路同知四十

田六頃判官二十貫田五頃下路俸同同知田七頃判官五頃江南行省上路同屬官有儒

學教授學正學錄醫學陰陽學教授司獄有丞平準行用庫及稅

務二提領大副使惠民藥局提領織染雜造二局府倉各大副使

又錄事司有達魯花赤判官凡十萬戶以上及衝要俱為上路不

及十萬戶為下路

散府達魯花赤一員知府或府尹一員治事與路同皆正四品俸六

腹裏職田十頃行省六頃同知判官各一員同知俸三十貫判官十八貫腹裏職田同知六所在

有隸諸路及宣慰司行省者有直隸省部者有統州縣有不統縣

者制有差諸州達魯花赤州尹各一員上州從四品中州正五品



下州從五品中下名知州

上州俸皆五十貫中州俸皆四十貫下州俸皆三十貫職田腹裏上州十頃中州八頃下州六頃行省上州五頃中州四頃下州三頃

州四頃下州三頃

有同知州判

同知俸上州二十五貫中州二十貫下州十八貫職田腹裏上州五頃中州四頃下州三頃行省上中下州均二頃州判俸上州十

八貫中州十五貫下州十三貫職田腹裏上州四頃中州三頃下州二頃行省上州二頃中州一頃五十畝下州一頃五十畝

凡五萬戶以上為上

州三萬戶以上為中州不及三萬戶為下州

諸縣達魯花赤尹各一員上縣從六品

俸二十貫腹裏職田四頃行省田二頃

中縣正七

品

下縣從七品

俸十七貫職田腹裏四頃行省一頃五十畝

有丞簿尉中下縣無

丞

丞俸十五貫簿上中十三貫下十二貫尉均十二貫職田腹裏丞三頃簿尉並二頃行省丞一頃五十畝簿尉皆一頃

領巡檢司秩九品凡

三萬戶以上為上縣萬戶以上為中縣不及萬戶為下縣

諸軍惟邊遠之地有之各統屬縣其秩如下州

諸蠻夷長官司達魯花赤長官副長官設置如下州參用其土人為之

為之

宣徽院以下至諸總管府皆有經歷都事知事照磨承發架閣管

勾檢校提控或省其二三品秩自從五品至從九品或有高下不

等又百官品凡九其食俸通例各品分上中下三等或止二等視

職事為差事大者依上例小者依中例從一品上六定中五定正

二品上四定二十五兩中四定一十五兩從二品上四定中三定

三十五兩下三定二十五兩正三品上三定二十五兩中三定一

十五兩下三定從三品上三定中二定三十五兩下二定二十五

兩正四品上二定二十五兩中二定一十五兩下二定從四品上

二定中一定四十五兩下一定四十兩正五品上一一定四十兩中

一定三十兩從五品上一一定三十兩中一定二十兩正六品上一

一定二十兩下一一定一十五兩從六品上一一定一十五兩中一定

十兩正七品上一一定一十兩中一定五兩從七品上一一定五兩中

一定正八品上一一定中四十五兩從八品上四十五兩中四十兩



正九品上四十兩中三十五兩從九品三十五兩凡勳十階上柱國正一品柱國從一品上護軍正二品護軍從二品上輕車都尉正三品輕車都尉從三品上騎都尉正四品騎都尉從四品驍騎尉正五品飛騎尉從五品爵八王正一品郡王從一品國公正二品郡公從二品郡侯正三品郡侯從三品郡伯正四品郡伯從四品縣子正五品縣男從五品上柱國郡王國公時有除拜餘惟用以封贈又文散官四十二開府儀同三司儀同三司特進崇進金紫光祿大夫銀青光祿大夫正一品自一品至五品皆大夫曰光祿榮祿從一品曰資德資政資善正二品曰正奉通奉中奉從二品曰正議通議嘉議正三品曰太中中亞中從三品曰中議中憲中順正四品曰朝請朝散朝列從四品曰奉政奉議正五品曰奉直奉訓從五品自六品至八品皆郎曰承德承直正六品曰儒林

承務從六品曰文林承事正七品曰徵事從事從七品曰登仕將仕正八品曰登仕佐郎將仕佐郎從八品武散官三十四二品皆上將軍曰龍虎衛金吾衛驃騎衛正二品曰奉國輔國鎮國從二品三品皆大將軍曰昭武昭勇昭毅正三品曰安遠定遠懷遠從三品四品五品皆將軍曰廣威宣威明威正四品曰信武顯武宣武從四品曰武節武德正五品曰武義武略從五品六品至八品皆校尉曰承信昭信正六品曰忠武忠顯從六品曰忠勇忠翊正七品曰修武敦武從七品曰保義進義正八品曰保義副尉進義副尉從八品凡文武官五品以上宣授六品以下敕授又內侍散官十四司天散官十四太醫散官十五教坊司散官十五不在諸文武之數其諸署令史書寫典吏監印知印怯里馬赤必闍赤玉典赤典書典給宣使驛使通事庫子奏差比於古者史胥繁不具



記

申濟世

申濟人

刊

門人曾傳瀚襄校

門人曾士琮詳校

元書卷二十二上



